

YA KELE KUBASIKA YA MWINI



Beto kulumusa bayintu ya beto. Mfumu, mutindu beto me vukana awa na suka yayi ya kitoko ya Paki, beto ke mona mwa matiti ke na kuzibuka, baniosi ke kwisa kubwa na zulu ya yawu samu na kubaka madia ya bawu, bandeke ke na kuyimbila mutindu ti bantima ya bawu me fuluka na kiese, samu ti ya kele Paki. Beto ke kwikila ti Nge me vumbulaka Yesu na lufwa, bamvula mingi me luta, bubu yayi, mpe beto ke kembila kilumbu yayi ya lubambuku.

² Mpe bika ti Paki kukwisa kuna na kati ya beto nionso, bubu yayi. Bika beto, mutindu bisadi ya Yandi, kubakula Ndinga ya Yandi, ti kuna beto vwandaka na kati ya kubundana ya Yandi kuna, mpe ti ntangu yayi ti beto me vumbuka na lufwa na Yandi mpe me vwanda kintwadi na bisika ya Mazulu.

³ Sakumuna lukutakanu awa na tabernacle, mpe bisika nionso ya ke kwenda, na nzila ya allo-allo yayi.

⁴ Belusa bambevo nionso mpe bantu ya mpasi. Bika ti yawu vwanda Paki samu na bawu, diaka, mpe exode kukatuka kimbevo na ngolo. Mpe bayina kele ya kufwa na disumu mpe yimbi, ti bawu kuzinga bubu yayi na nzila ya Klisto. Mpe beto ke kumisa Nge, samu beto me lomba yawu na Nkumbu ya Yandi. Amen.

⁵ Kieleka mu ke salaka yayi ntangu ya mbote-mbote, na suka yayi samu na kuvutuka awa na Jeffersonville, na Indiana, na dibuundu yayi ya nene, yinzo-Nzambi ya kifuluka mpe ya kele na bantu ya kutelama, na nziunga mpe na nganda, mpe na balupangu ya matoma mpe bisika nionso. Samu na beno bantu yina kele na allo-allo na yinsi ya muvimba, ya ke suka mosi ya kitoko mingi awa.

⁶ Na ngunga ya tanu na suka yayi, nkundi ya munu ya fioti na ntulu ya mbwaki pumbukaka kuna na nela mpe yandi me vumbula munu. Ya ke monana ti mwa ntima ya yandi vwandaka pela, na kutuba, “Yandi me vumbuka na lufwa.” Mu ke banzaka ntangu nionso na mwa ndeke yayi na kuvwandaka nkundi ya munu, samu ti mu zola yandi.

⁷ Mutindu me tuba disolo mosi samu na yandi, “Mwa ndeke mosi ya mwa mbwaki monaka Yandi ke mona mpasi na zulu ya kulunsi, kisika disumu tulaka Yandi.” Ya kieleka, mwa ndeke yayi ya fioti ve vwandaka na disumu. Yandi zolaka kufwa ve mwa ndeke yayi. “Kasi yandi pumbukaka kuna na kulunsi mpe mekaka na kubenda bansonso, na mwa yinwa ya yandi ya fioti, mpe yandi me kumisa ntulu ya yandi nionso mbwaki.” Mpe ya kele mutindu yina mu ke zolaka ya munu kuvwanda, diaka,

mutindu kinwaninu, na kumekaka na kukeba Kima yayi ya nkembo samu na yina Yandi kufwaka.

⁸ Na kuzabaka ti ba me zenga ntangu ya beto awa, mingi-mingi samu na bankundi yina ke na kuwa na nzila ya allo-allo, mu ke zola kubenda bukebi ya beno na suka yayi samu na kizizi yina ba bakaka na foto na camera mwa bantangu me luta, samu na vision yina mu kuzwaka awa na tabernacle, ya kukatuka na Indiana, samu na kukwenda na Arizona; kisika mu ke kutana, na mutindu ya pyramide, Bawanzio sambwadi. Mu vwandaka zaba ve yina ke salama na ntuala, ntangu mu kumaka kuna, mu vwandaka banza ti ya vwandaka nsuka ya luzingu ya munu, ti muntu ve lendaka telama na kupasuka yina; mpe mu ke kwikila ti beno nionso me zaba disolo yango. Mpe kuna na Sabino Canyon, na suka mosi mutindu yayi, kuna na kati ya kisambu, ba tulaka mbele mosi na diboko ya munu, mpe ba tubaka, “Yayi kele Ndinga, mpe Mbele ya Ndinga.”

⁹ Na ntuala, Bawanzio monikaka mutindu yawu tubamaka na profesi. Mpe na ntangu yina mosi, mungenzi mosi ya Nsemo katukaka kisika mu vwandaka me telama, mpe kwendaka na ba-kilometre makumi yiya na nana kuna na zulu, mpe pene-pene ya selekele, mutindu mapapu ya Bawanzio, mpe fikulaka kuna na mazulu mutindu ya pyramide na kati ya kimvuka mosi yina ya Bawanzio yina monikaka.

¹⁰ Bantu ya mayele bakaka foto, na mutindu nionso kubanda na Mexico, mutindu yawu katukaka na nord ya Arizona, kisika Mpeve-Santu tubaka mu ke telama, “na nord-est ya Tucson.” Mpe ya kwendaka na mipepe, magazine *Life* bakaka bafoto, “Kima mosi ya misitiki na zulu mingi kuna na mipepe, kisika ya lendaka vwanda ve na madidi ya kima mosi ve, kisika ya lendaka vwanda ve na mupepe ya kima mosi ve; kuna na zulu mpe na ba-kilometre makumi yiya na nana, mpe vwandaka na ba-kilometre makumi yiya na tatu na nene,” mpe zangukaka tii na kisika yina Bawanzio yina vwandaka.

¹¹ Ntangu yayi, bawu yufulaka, samu na kuzaba. Science, mosi ya bawu na Tucson, zolaka zaba nsasa, kasi mu tubaka na bawu ve. Beno nionso me zaba yawu, ba zabisaka yawu na ntuala. Kasi ya vwandaka ve samu na bawu, ya vwandaka samu na beno.

¹² Mpe na yina Yandi tubaka na munu, mpe tubaka, “Bidimbu Sambwadi ke zibuka. Mansweki sambwadi, bima sambwadi ya Biblia, yina ba me kanga kubanda mbandukulu ya yinza, ke monisama.” Mpe beto, kasi nkonga mosi ya fioti ya kukikulumusa, vwandaka fwanikisa na yinza ya muvimba, beto me sepela na balusakumunu yayi, kuwa mansweki yango. Makwela, kufwa makwela, nkuna ya nyoka, bakyuvu nyonso yayi yankaka, me monisama ya muvimba na beto, ve na nzila ya muntu, kasi na nzila ya Nzambi, Yandi mosi, yina me zibula mansweki sambwadi yayi; ya yina Dibuundu vwandaka,

mutindu Yawu wandaka na kati ya Klisto na mbandukulu, mpe mutindu Yawu ke monisama pwelele na kilumbu ya nsuka.

¹³ Mpe ntangu yayi, mutindu yayi zangukaka, beto kele na foto na paki kuna na nganda. Kasi, na yina, mu ke na foto awa, kana beno tala, mutindu magazine *Life* me basisa yawu. Kasi mu ke kukiyufula kana nkonga ya bantu ya munu, yina kele awa, me talaka ya kieleka foto yango, beno me mona, beno me mona, na mutindu ya lendaka vwanda.

¹⁴ Beno bambuka moyo, mu wandaka longa ntangu vision yayi kwisaka, na zulu ya dilongi ya Buku ya Apocalypse, kisika bazuzi ya ntama, kisika beto monaka Yesu na Apocalypse 1. Ntangu beto bandaka na kuzibula Bidimbu Sambwadi . . . to—to Bansungi ya Dibuundu, mu zola tuba, kaka tii na kuzibuka ya Sambwadi. Klisto wandaka ya kutelama na “bansuki mutindu mika, ya mpembe.” Mpe mu tangunaka yawu na beno, ti bazuzi ya ntama ya Ngelesi, mpe bazuzi ya ntangu ya ntama, ntangu ba wandaka kuma bazuzi, ba wandaka zenga ndefi, ba wandaka pesa bawu kimfumu ya nene. Ba wandaka lwata perruque ya mpembe, mutindu ya vwandaka, kuna na zulu ya bayintu ya bawu, samu na kutalisa kimfumu ya bawu ya nene.

¹⁵ Mbote, kana beno balula foto mutindu *yayi* mpe beno tala, beno lendaka kieleka kumona yawu na kati ya nkonga, ya kele Klisto. Beno me mona meso ya Yandi ke tala *awa*, kaka ya kulunga mutindu ya zolaka vwanda; ya kulwata perruque ya mpembe ya Bunzambi ya Nene mpe Zuzi ya mazulu nionso mpe ntoto. Beno lenda mona meso ya Yandi, mbombo, yinwa ya Yandi? [Dibuundu me tuba, “Amen.”—Mu.] Bawu losaka foto mutindu *yayi*, mutindu ba bakaka yawu; mutindu yayi, mutindu ya zolaka vwanda. Mpe beno . . . Beno lenda mona yawu? [“Amen.”] Yandi kele Zuzi ya Nene. Ya kele ve na yankaka kasi Yandi. Mpe yina kele kutalisama ya kulunga, kimbangi ti Nsangu yayi kele Kieleka. Yayi kele Kieleka. Ya kele kieleka. Mpe ke sala Yandi ve Muntu ya tatu, kasi kaka Muntu mosi!

¹⁶ Na mpembe, beno me mona, beno ke mona ndombi, kizizi ya Yandi, mandefo ya Yandi, mpe meso ya Yandi. Mpe beno tala, Yandi ke na kutala . . . Na Yandi ke basika Nsemo yayi ke sema na diboko ya kibakala, kisika Yandi ke na kutala. Mpe na zulu ya kulunsi, ya kele kisika yina Yandi wandaka tala, na diboko ya kibakala, kisika Yandi lemvokilaka nsumuki. Na Nsemo ya mvumbukulu ya Yandi, beto ke kwenda kaka na Nkumbu ya Yandi.

¹⁷ Mu zola, na suka yayi, ti mu me kuzwa ntangu mingi samu—samu na kumanisa na diambu ya kuyitukisa yayi yina kele kukondwa ntembe, me ndimisama samu na bamvula makumi tatu yina me luta, to makumi tatu na tanu, kaka awa na yinzo—Nzambi yayi; kubanda kuna na nzadi, ntangu Nsemo yina mosi kulumukaka awa na Jeffersonville, na mvula 1933, mpe tubaka

bampova yina, “Mutindu ba fidisaka Jean Baptiste na ntuala ya nkwezulu ya ntete ya Klisto, Nsangu ya nge ke kwisa na ntuala ya nkwezulu ya zole.” Beto keke na ntangu ya nsuka, mpe beto ke mona yawu. Beto ke kukiyufula bantangu yankaka samu na yinki ya me mwangana ve na zulu ya ntoto; mu banza ti na ntangu beto ke vwanda na siansi ya kutendula yawu, kana Nzambi zola.

¹⁸ Ntangu yayi mu zola beno kubaka na—na Babiblia ya beno, mutindu beto ke kwikilaka ntangu nionso ti Ndinga fwana kwisa ntete, na kutanga ya Ndinga. Mu ke tangaka ntangu nionso Yawu, samu ti Yawu. . . Bandinga ya munu keke ndinga ya muntu, yawu ke kubwa; kasi Ndinga ya Nzambi lenda kubwa ata fioti ve.

¹⁹ Ntangu yayi beto ke—ke tanga na Masonuku ya Santu, disonama mosi. Mpe beto zola ti beno baluka, ntete na bisika tatu na kati ya Biblia, ti mu me sola samu na kutanga. Mosi ya yawu keke na Apocalypse, kapu ya 1te, mpe nzila ya 17 mpe ya 18; yayi keke kisika yina Yandi monikaka “bansuki ya Yandi mpembe mutindu mika ya dimeme; mpe makulu ya Yandi vwandaka mutindu kisengo.” Mpe kuna mu zola beno kubaka, na Babiblia ya beno, Romains 8:11. Mu me soola, na suka yayi, bisika tatu samu na kutanga, na Masonuku ya Santu, samu na Nsangu ya munu bubu yayi, ti Mfumu me tula na zulu ya ntima ya munu samu na mvumbukulu. Mpe na yina mu zola ti, beno baka diaka, Marc 16:1 mpe 2. Kuna mu ke tula dibanza ya munu—ya munu.

²⁰ Ntangu yayi na Apocalypse 1:18, beto ke tanga Bandinga yayi, 17 mpe 18.

Mpe ntangu mu monaka yandi, mu kubwaka na makulu ya yandi mutindu ya kufwa. Mpe yandi tulaka diboko ya yandi na zulu ya munu, na kutubaka na munu, vwanda na boma ve; samu ti mu keke ya ntete mpe ya nsuka:

Mu keke yandi yina ke zinga, mpe me kufwa; mpe, tala, mu keke moyo ntangu nyonso, Amen; mpe mu keke na bafungula ya lufwa mpe difelo.

²¹ Mpe na ba-Romain kapu 8 mpe nzila ya 11, beto ke tanga yayi.

Kasi kana Mpeve ya yandi yina vumbulaka Yesu na lufwa na kati ya beno, yandi yina vumbulaka Klisto na lufwa ke kindisa diaka banzutu ya beno yina ke kufwa na nzila ya Mpeve ya yandi yina ke zingaka na kati ya beno.

²² Mpe ntangu yayi na Marc kapu 16, kapu ya mvumbukulu, kapu 16, banzila ya 1 mpe ya 2.

Mpe ntangu saba lutaka, Marie ya mbanza Magdala, mama . . . mpe Marie mama ya Jacques, mpe Salomé, nataka bamananasi, samu na kupakula yandi.

Mpe na suka-suka kilumbu ya ntete ya sabala, bawu kwendaka na ntoni na kubasika ya mwini.

²³ Ntangu yayi, dilongi ya munu ya suka yayi, mu ke zola kubaka dilongi yayi: *Ya Kele Kubasika Ya Mwini*. Mpe mutindu yintu ya dilongi, mu zola sadila, “Ngolo ya nkindusulu.”

²⁴ Ntangu yayi, beno zaba, ntangu yankaka beno waka radio mpe balongi ya mutindu na mutindu ke longa. Mpe Mpangi ya beto ya lukumu Neville na suka yayi me longa dilongi ya yandi ya paki, na zulu ya mvumbukulu. Mpe mu banzaka ti mu lendaka baka yawu fioti na mutindu yankaka, samu na kuvwanda ya kuswaswana ve, kasi kaka samu na kuyika fioti diaka, ntangu yankaka na mutindu yankaka, samu na beno. Masonuku, konso mutindu beno ke kwenda na Masonuku, Yawu ke samunaka ntangu nionso Yesu Klisto. Beno lendaka ve kukwenda ntama ya yawu, na mutindu nionso. Ya ke samunaka Yandi ntangu nionso.

²⁵ Ntangu yayi, mutindu yinza bubu yayi na kisalu ya lubambuku, to, na kutala, na États-Unis mpe lweka yayi ya ntoto, na suka yayi, na kati ya mabuundu mpe bisika nionso, kele mukembo ya lubambuku ya lunungu ya kulutila nene yina muntu me kuzwaka ntete ve.

²⁶ Mu banza, mutindu Mvulusi ntangu Yandi kufwaka, to mutindu mwana ya fyoti ntangu Yandi butukaka, Yandi zolaka vwanda awa ve kana ti beto kota na ntoto. Mpe ntangu Yandi kufwaka, kieleka Yandi me lemvokila disumu ya beto. Kasi, diaka, ya vwandaka na ba-bébé mingi ya fioti butukaka, mpe ya vwandaka na bantu mingi yina talaka mpasi mpe kufwaka samu na dyambu ya kieleka, kasi ya vwandaka ve na mosi yina lendaka vumbula yandi mosi diaka tii bubu yayi.

²⁷ Ntangu yayi, ya ke sabala mosi ya kulutila nene na kati ya masolo, mukembo ya nene ya bantangu nionso, Paki yayi kele kisika Yandi talisaka yina Yandi tubaka. Muntu lendaka tuba bima, kasi ntete ba lendaka ve kaka kukwikila yawu, ya muvimba, kana ya me talisama ve ti ya kele Kieleka. Mpe mutindu Nzambi, Yandi yina tubaka, “Talisa bima nyonso; kukangama na yawu yina kele mbote,” Yandi zolaka tuba na beno ve na kusala kima yina Yandi zolaka sala Yandi mosi ve. Na yina Yandi siamisaka Nani yayi vwandaka yina kufwaka samu na disumu ya beto.

²⁸ Mpe, ntangu yayi, ya kele kaka ve kilumbu ya lubambuku, ya bafololo yayi nionso ya Paki, mpe bayimpu ya Paki, mpe balapin rose, mpe nionso yankaka, yina beto kele na yawu, mpe mikembo ya bansambulu; yina kele mbote, kasi yayi kele ve kima ya kieleka na mutindu yina.

29 Mutindu bantu bubu yayi ke na kumeka na kutuba, “Beto fwana sukula makulu mbala mosi na mvula, samu na—na kilumbu ya Yiya, mpe na Kilumbu ya tanu beto ke baka mbundana,” mpe malongi yankaka ya kuswaswana ya . . . Ba ke zonzaka kana ya lendaka vwanda kilumbu *yayi* to kilumbu *yina*, to kana ya zolaka vwanda kilumbu ya saba to kilumbu ya ntete ya sabala; to . . . Bima nyonso yayi kele kaka kinkulu. Wapi mbote nionso ya yawu ke sala beno, kana beno ke sala Kareme to beno ke sala ve Kareme, kana Luzingu kele ve na kati ya beno? Ya kele kaka lubambuku. Yina, ya kele ve na kima mosi yina ke telemina yawu, kasi ba me kangama na binkulu ya bawu, kasi ba me bika kima ya ngudi.

30 Satana ke kipe ve wapi mutindu beno kele musambidi, to wapi mutindu ya kulunga beno kele na kati ya Malongi ya beno. Kana beno kondwa Luzingu yina, beno ke mata ve, na mutindu nyonso. Ata ti beno kele musambidi, wapi mutindu beno kele mbote, mabuundu yikwa beno me kotaka to beno ke kota, ya ke na kima mosi ve kana beno me butuka ve mbala zole.

31 Na yina, kana Nzambi vumbulaka Yesu na lufwa, Yandi vumbulaka Yandi samu na lubambuku? Mpe suka yayi ya mvumbukulu kele kaka kilumbu mosi na kati ya mvula, to kilumbu yina beto ke kembila yayi? To, beto ke bayina ke kuzwa ndandu ya mvumbukulu ya Yandi? Yinki yawu zola tuba samu na munu? Yinki yawu zola tuba samu na beno? Ntangu yayi beto ke kwikila, na lukwikilu, ti Yandi me vumbuka na lufwa, kasi yinki yina ya fwana sala na munu? Ya vwandaka bamvula mafunda zole me luta.

Ntangu yayi samu na kuzwa dilongi yayi!

32 Mutindu mu vwandaka ya kulemba, diboko ya munu vwandaka sala munu mpasi, samu na bantunga yina infirmiere tobulaka munu. Na yina, mu ke kwenda na bayinsi ya nzenza ntangu yayi, mutindu beno me zaba, na mwa bilumbu fioti, mpe mu fwana kubaka bantunga yayi, mwana ya munu ya bakala mpe munu. Mpe na nionso yayi, choléra, fièvre jaune, mu vwandaka ya kulemba mingi, ya me sala ti munu kubela. Na yina, César ke lomba ti beno kubaka bantunga yayi ntete beno kwenda na bayinsi ya nzenza. Mpe Yandi tubaka, “Beno pesa na César yina kele ya César, kasi na yina beno pesa na Nzambi yina kele ya Nzambi.”

33 Mpe mutindu mu vwandaka ya kuvwanda kuna, mu vwanda kukiyufula yinki mu zolaka tuba na bantu yayi ke vingila na suka yayi; na yina mu ke vutula matondo mingi samu, mpe na babakala mpe bakento yina ke kangama na yina beno ke tuba ti ba ke pesa luzingu ya bawu samu na yina beno ke tuba. “Wapi mutindu mu lenda sala yawu? Yinki mu lendaka baka samu na dilongi yayi?”

³⁴ Mpe na yina ntangu mu vwandaka ya kuvwanda kuna, kaka ya kulala, ba bulaka na kielo ya munu, kuna na ntuala ya yinzo. Muntu mosi vwandaka ve kuna kasi munu kaka, mutindu mu me zaba. Mu vwandaka kuwa. Mu kuwaka mbote ve yina ya vwandaka. Na manima ya mwa ntangu fioti, na kielo ya cabinet ya bureau ya munu, ba bulaka, mpe muntu mosi vwandaka landila na kuningisaka kielo. Mpe mu—mu kwendaka na kielo mpe zibulaka kielo, mpe, na ngitukulu, mwana-kento mosi ya kitoko, ya fioti, na bansuki ya jaune, na meso ya bleu vwandaka ya kutelama kuna, yandi monanaka mutindu mwa fololo ya Paki; yandi kele ya kuvwanda awa ke na kutalaka munu ntangu yayi.

³⁵ Yandi pesaka munu kalati. Mpe ya vwandaka. . . Samu, mu banza ti ntangu mu ke vutuka na yinzo ya ke vwanda na bakalati ya Paki, mpe nionso yina; kasi mosi yina, vwandaka yina mu kuzwaka, ntangu mu katukaka na yinzo. Mpe yandi tubaka, “Mpangi Branham, yayi me katuka na papa mpe munu.” Yandi zolaka kieleka ti “munu” kuvwanda na flaze ya yandi. Mpe tata ya yandi yina kele na arthritis, ya kuvwanda na kiti ya bambevo, me tinda kalati yayi. Ntangu mu bakaka yawu mpe vutulaka matondo na cherie yina ya fioti, mutindu yandi vwandaka baluka mpe vwandaka bika kielo, mu zibulaka kalati.

³⁶ Mpe na mutindu ya kalati yayi mu me baka dilongi ya munu. Na yina, kalati vwandaka Santu Marc 16:1 mpe 2, mwini me basika, mwini vwandaka ke basika. Na yina mu banzaka yawu, mpe kuna dilongi yayi “nkindusulu,” ya Yesu Klisto samu na kuvumbuka na lufwa, mu me baka dilongi ya munu.

³⁷ Ntangu yayi, mwini, na kubasika ya mwini. Mbote, ya vwandaka na ntangu yina yinza vwandaka na kati ya mudidi. Ya vwandaka ve na mutindu, mpe ya vwandaka ya mpamba. Mpe ya vwandaka nionso ya kufika na masa, mpe ya vwandaka kuna na kati ya atimosifere ya mudidi, ya mbungi, ya ndombi. Mpe Mpeve ya Nzambi vwandaka tambula na zulu ya maza yango, mpe tubaka, “Ti nsemo kuvwanda.” Nzambi vwandaka na kikuma ya kusala yawu, samu kuna na nsi ya masa yina vwandaka bambuma yina Yandi kunaka, mpe ya lombaka nsemo yina ya mwini samu na kupesa yawu luzingu.

³⁸ Mpe Nsemo ya ntete yina ba pesaka na ntoto vwandaka Ndinga ya Nzambi yina tubamaka. Nsemo ya ntete yina me bula ntoto vwandaka Ndinga ya Nzambi yina tubamaka. Yandi tubaka, “Ti nsemo kuvwanda,” mpe nsemo vwandaka. Yina me pesa mpimpa na nsemo, samu na kubasisa ngidikulu ya kyese mpe luzingu na zulu ya ntoto. Na yina, Mpeve ya Nzambi, mutindu Yawu vwandaka tambula na zola mpe kukabula mpasi, na kilumbu yina ya nene, kilumbu ya ntete ya kubasika ya luvangulu na zulu ya ntoto; mwini basikaka mpe kombaka ntoto, mpe yumisaka bamasa, mpe salaka atimosifere na zulu ya yawu. Mpe, samu na ntangu ya yawu ya ntete, kiesse mpe luzingu zolaka

kwisa na zulu ya ntoto, na nzila ya nkuna. Yina vwandaka ngunga ya nene.

³⁹ Kasi, oh, ya vwandaka ve na kima mosi, kubasika yina ya mwini, na kubasika ya mwini ya suka yayi ya Paki. Ntangu yayi, na mwini yina me basika na mazulu, ya me basisa kubasika ya mwini ya kulutila nene yina me vwandaka ntete ve; samu ya me nata nsangu ya nene mingi kulutila kubasika ya mwini yayi, kulutila ya salaka na kubasika ya mwini na mbandukulu. Kubasika ya mwini yayi me nata nsangu, ti, “Yandi me vumbuka na lufwa! Yandi me kindisama na kati ya bantu ya kufwa, mutindu Yandi silaka. Yandi me vumbuka na lufwa.”

⁴⁰ Ntangu ya ntete mwini basikaka, na Genèse, ya vwandaka nata nsangu mosi ti ya ke vwanda na luzingu na zulu ya ntoto, luzingu yina ke kufwa.

⁴¹ Kasi na ntangu yayi, ntangu mwini basikaka, ya vwandaka na bakubasika zole ya mwini; kubasika, yankaka, ya Mwana [Na Kingelesi “Son”—Mu.] Ya vwandaka. . . kaka ve kubasika ya s-u-n [m-w-i-n-i], ya vwandaka kubasika ya S-o-n [M-w-a-n-a] samu na kunata Luzingu ya Kukonda nsuka na Nkuna nionso ya nsilulu ya Nzambi yina Yandi na nzila ya luzabu ya mantwala ti ba ke vwanda na zulu ya ntoto.

⁴² Mutindu mosi bimenina lendaka ve kuzinga kuna na mbandukulu kukondwa s-u-n [m-w-i-n-i—Mu.] samu na kunata luzingu; mutindu mosi, bubu yayi, ntangu bana ya Nzambi kele na zulu ya ntoto, ya ke lombamba Nsemo ya S-o-n [M-w-a-n-a] samu na kunata Luzingu ya Kukonda nsuka na bawu, Baya Yandi yina ba soolaka ti Yandi zabaka ntete mbandukulu ya yinza. Yandi soolaka bawu na kati ya Yandi mosi ntete mbandukulu ya yinza.

⁴³ Mpe na suka ya Paki, na yina, na ntoto yayi kisika mosi kuna banzutu ya beto vwandaka tula ntangu yina, samu ti beto kele putulu ya ntoto. Mpe na Zulu, ya vwandaka na Buku ya lubambuku, mpe bisalu ya Yandi vwandaka na kati ya Yandi, na kuzabaka ti samu Mwana yayi ya Nzambi me vumbuka, Ya ke vumbula diaka na Luzingu mwana nionso yina ba kubikaka samu na ntangu yayi ya nene. Yandi zabaka ti ya ke vwanda. Mpe wapi mutindu ya nkembo mingi kubasika ya mwini yayi vwandaka kulutila ya vwandaka na mbandukulu, ntangu ya basikaka samu na mbala ya ntete!

Ntangu yayi, na zulu ya kubenda yayi ya nene ya Kidimbu ya Paki!

⁴⁴ Ntangu yayi, bubu yayi beto kele na kidimbu ya kukondwa tuberculose, kidimbu ya Paki. Bantu ke tindaka nsangu, na mosi na yankaka, mpe samu na kusimbisa kinkuku ya nene ya mbongo to campagne yayi ya nene, samu na kusadisa badokotolo mpe na science médicale na kusala kima mosi, samu na kulembika to kupesa lusalusu na tuberculose. Ya kele kidimbu, yina beto ke bokila kidimbu ya Paki, ntangu beto ke tinda nsangu mosi na

yankaka. Kasi ntangu beto ke kuzwa nsangu, kidimbu yayi me bukana, samu kidimbu kele yina me kanga nsangu kuna na kati.

⁴⁵ Mpe ntangu yayi, Kidimbu ya kieleka ya Paki, na nsungi yayi ya kubasika ya mwini, kupanzanaka; mpe kinsweki, ya Luzingu na manima ya lufwa, kumonisamaka pwelele. Na ntwala ya ntangu yina, beto zabaka ve. Yinza vwandaka na kati ya mudidi, na kati ya bumpofo, landila bangindu ya muntu. Mabanza vwandaka na kati-kati ya ntima ya muntu, kinkulu me salama. Bantu vwandaka sambila biteki. Bawu vwandaka sambila mwini. Bawu vwandaka sambila banzambi ya mutindu na mutindu. Mpe bantu ya mutindu na mutindu yina me tuba, bawu nionso kwendaka na ntoni, mpe bawu vwandaka na ntoni.

⁴⁶ Kasi Kidimbu ya kieleka bukanaka, mpe Yandi Yina zingaka mutindu beto ke zingaka, kufwaka mutindu beto ke kufwa, yina vumbukaka na lufwa. Wapi mutindu ya suka! Ata mbala mosi ve ti ya ke mutindu yina, na kati ya masolo nionso ya yinza. Kinsweki zabanaka ti Yandi vwandaka mvumbukulu mpe Luzingu.

⁴⁷ Mpe Yandi tubaka, ntangu Yandi kwisaka na suka yina, “Samu mu ke moyo, nge mpe ke moyo.” Kaka ve ti Yandi kuzwaka mvumbukulu, kasi Bankuna nionso yina vwandaka pema na kati ya nsilulu ya nene ya Nzambi kuzwaka mvumbukulu samu na kuvutuka na Luzingu. Samu, Yandi tubaka, “Samu mu ke moyo, beno mpe ke moyo.” Yina vwandaka kubukana ya Kidimbu. Na kubasika ya mwini yayi ya nkembo, Nzambi lakisaka, to yina ba siamisaka, Ndinga ya Yandi.

⁴⁸ Na kubasika ya mwini yayi ya nkembo, Nzambi me talisa, to me siamisa, Ndinga ya Yandi. Mawa nionso mpe bantembe nionso yina vwandaka na mabanza ya bantu me katuka, samu awa vwandaka Yandi Yina zingaka, kudiaka, kunwaka, mpe bundanaka na nkonga ya bantu, yina tubaka, “Mu ke na kiyeka ya kupesa luzingu ya Munu; mu ke na ngolo ya kuvumbula yawu diaka.” Mpe ntangu yayi kaka ve ti Yandi salaka nsamunu, kasi Yandi talisaka ti ya vwandaka Kieleka. Oh, wapi diambu yayi ya nkembo ya kele!

⁴⁹ Mu ke ndima ti na suka yayi ata mpe beto, yina ke kwikilaka yawu, lendaka ve kubakula yinki diambu yayi ya nene ya vwandaka. Samu ti Yandi vumbulaka bantu na lufwa, beto me vumbuka yimeni na lufwa, samu ti beto vwandaka na kati ya Yandi.

⁵⁰ Beno tala ntangu yayi. Mutindu mudidi vwandaka fika ntoto, mpe bankuna lendaka ve kuzinga kukondwa m-w-i-n-i [s-u-n] kubasika, mpe mudidi vwandaka fika ntoto. Mpe ntangu yayi M-w-a-n-a [S-o-n] basikaka, mpe mudidi nionso zimbanaka na Nsemo yayi, na yina Yawu mwanganaka na bayinsi, na bantu, ti, “Yandi kele awa ve, kasi Yandi me vumbuka na lufwa!” Wapi—wapi mutindu ya nsamunu yayi!

Yandi siamisaka Ndinga ya Yandi. Yandi talisaka Yawu, ti ya kele kieleka, samu ntangu yayi Yandi nungaka lufwa, difelo, mpe ntoni.

⁵¹ Butatu ya diabulu; lufwa, difelo, mpe ntoni; samu Satana kele mubandisi ya lufwa, yandi kele mfumu ya difelo, mpe ntoni. Mpe ya vwandaka butatu ya Satana, diambu mosi nataka yawu, ya vwandaka lufwa. Lufwa, nge ke kwenda na ntoni; mpe nge kele nsumuki, nge ke kwenda na difelo. Nionso yina vwandaka kima mosi, butatu ya Satana, yina vwandaka lufwa. Yawu yina kangaka muntu na kimpika na bamvula yayi nionso.

⁵² Kasi ntangu yayi butatu ya kieleka ya Nzambi, yina vwandaka kumonisama ya Mosi na kati ya Klisto, Yina vwandaka Luzingu, mpe bukaka Bidimbu mpe nungaka mbeni, mpe vumbukaka, Nzambi mosi ya kieleka mpe ya moyo. “Mu kele Yandi yina kufwaka, mpe Mu ke zinga ntangu nyonso, mpe Mu kele na bafungula ya lufwa mpe difelo.” Nzambi, kati na Mosi, kumaka Muntu, mpe zingaka na kati ya beto, mpe nungaka mbeni nionso. Mpe talisaka ti ba nungaka butatu ya Satana, mpe ti butatu ya Nzambi zabanaka, samu Nzambi kaka vwandaka na ngolo ya kuvutula diaka na Luzingu. Yandi vwandaka Emmanuel yango. Nzambi kumonisamaka na nzutu.

⁵³ Kuyituka ve ti Yandi lendaka tuba kuna, na Matthieu kapu 27, “Bangolo nyonso na Mazulu mpe na ntoto me pesama na diboko ya Munu. Mu ke fidisa beno na kuvwanda bambangi ya Munu, na yinza ya muvimba.” Yandi nungaka lufwa, difelo, mpe ntoni. Yandi salaka yawu kaka ve; mpe me basika, na lunungu, na ngolo nionso ya Mazulu na ntoto. Nionso yina vwandaka Tata, bayina nionso vwandaka Mpeve-Santu, mpe bayina nionso me vwandaka ntete ve, vwandaka na kati ya Yandi. “Bangolo nionso na Zulu mpe na ntoto me pesama na Munu.” Bima yankaka nionso kele ya kukondwa ngolo. Yandi nungaka yawu.

⁵⁴ Ntangu yayi! Mpe na yina, kaka yina ve, Yandi fidisaka Ndinga na bilandi ya Yandi, kukwikila ya Yandi. “Beno vwanda na boma ve, samu ti mu kele Yandi yina kufwaka, mpe kele moyo dyaka ntangu nyonso. Mpe mu kele na bafungula ya lufwa mpe difelo; mu me nunga yawu dezia. Beno vwanda diaka ve na boma, samu Nkuna nionso ya Nzambi yina ba zabaka na ntwala, ke kwisa na Luzingu ntangu Nsemo yayi ke mwangana na zulu ya ntoto, Nsangu ya mbote yayi ya nkembo. Na nsungi nionso, Ya ke buka mbuma yina Nzambi tumaka Yawu na kubuka.” Yandi me vumbuka na lufwa.

⁵⁵ Oh, yinki diambu yayi ya kitoko ya kele, “Mu ke zinga, to me kindisama.” Mpova yayi ke zola kutuba, mpova yayi *me kindisama*, mpova yayi ya Grec ke zola kutuba ya kele kima yina “ke zinga na manima ya lufwa.”

⁵⁶ Mutindu nkuna yina ke kwendaka na ntoto, ya fwana kufwa, konso kitini ya nkuna. Ya fwana kubola, konso kitini ya nkuna.

Mpe konso kitini ya luzingu, yina vwandaka na kati ya nkuna, fwana basika diaka.

⁵⁷ Yandi me “kindisama.” Yawu kaka ve. “Mpe Mu ke fidisa Luzingu ya mutindu mosi yina kindisaka Munu, Ngolo yina basisaka Munu na ntoni, Mu ke fidisa Yawu na zulu ya beno, samu na kukindisa beno, ti kisika yina Mu kele beno ke vwanda mpe.”

⁵⁸ Na kapu ya Luc, kapu 24, nzila ya 49. Yandi tubaka, “Tala, mu ke tinda nsilulu ya Tata na zulu ya beno; kasi beno vwanda, to beno vingila, na mbanza ya Jérusalem, tii kuna beno ke fuluka na Ngolo ya Mazulu.” Samu na kutalisa ti Yandi bakaka kaka ve bandandu nionso na yawu, kasi Yandi kabulaka bandandu yina.

⁵⁹ Yandi kwisaka samu na kuvulusa, to samu na kunata na Luzingu, Nkuna yina ba kubikaka ntete ti Nzambi kumonaka ntete mbandukulu ya yinza mpe tulaka bankumbu ya bawu na kati ya Buku ya Luzingu. Mpe awa bawu kele na zulu ya ntoto, kukondwa kivuvu; Yandi kwizaka kaka ve samu na kuvwanda Lusakumunu, kasi samu na kukabula balusakumunu na Nkuna nionso yina ba zabaka na mantwala. Ntangu yayi, kana Nkuna vwandaka ve na ntoto, ya lendaka ve kuzinga. Ya zolaka vwanda na ntoto, mpe kumena diaka. Ata ti ya me vwanda bantangu mingi na kati ya mudidi, Ya ke basika ntangu M-w-a-n-a ke sema na zulu ya Yawu. Beno tala ntangu yayi, Yandi ke kwisa kukabula Yawu na beto.

⁶⁰ Kuyituka ve ti Nsangu ya mbote kele diambu ya mbote. Mpova yawu mosi *Nsangu ya mbote* zola kutuba “diambu ya mbote.” Mambu ya mbote, yinki? Kana muntu kufwa samu na beto, ya kele bansangu ya mbote. Kana Klisto butukaka, ya kele bansangu ya mbote. Kasi ata mbala mosi ve nsangu, ata mbala mosi ve ti ya vwandaka na nsangu mutindu nsangu yayi, ti, Yandi Yina salaka nsilulu me siamisama nsilulu, ti, “Yandi kele moyo kukonda nsuka, mpe ke kuzwa bafungula ya lufwa mpe difelo, na diboko ya Yandi.” Mudidi nionso me kwenda ntama. Ya vwandaka diaka ve na mudidi ke monana, samu Mwana me basika na ntoni. Ya vwandaka diaka ve, “Mbote, Yandi ke kwisa, to Yandi lenda kwisa.” Yandi kwisaka dezia, Nsangu ya mbote, diambu ya mbote!

⁶¹ Beno tala, Nsangu ya kieleka ya Nsangu ya mbote, Yawu mosi, ke kusiamisa na bantu ti Yandi me vumbuka na lufwa. “Kwenda tuba na bilandi ya Munu ti Mu me vumbuka na lufwa, mpe Mu ke kutana na bawu, samu na kusiamisa yayi na bawu.” O Nzambi, wapi mutindu na kilumbu yayi ya nsuka ke vwanda dyaka na Nsemo na zulu ya ntoto! “Mpe mu ke lakisa na bilandi ya Munu! Kwenda tuba na bawu ti Mu me kufwa ve, mpe Mu kele ve kinkulu, kasi Mu kele Klisto ya moyo. Mu ke kutana na bawu. Nata Nsangu yayi na bilandi ya Munu, ti Mu me vumbuka na lufwa,” Nsangu ya mbote, diambu ya mbote.

Beno ke tuba, “Ya kieleka?”

⁶² Hebreux 13:8 ke tuba, “Yandi kele mutindu mosi mazono, bubu yayi, mpe kukonda nsuka.” Beto, bantu ya Yandi, fwana talisa ti Luzingu ya Yandi kele na kati ya beto na ntangu yayi, bantu ya Luzingu yayi. Luzingu, ya vwandaka ata fioti ve na luzingu yina ba zingaka mutindu yawu; Yandi vwandaka Mwana ya Nzambi. Mpe Yandi kufwaka, mpe yina kangaka yawu; kasi ntangu Yandi vumbukaka diaka na lufwa, na suka ya Paki, na yina beto, mutindu bisadi ya Yandi, me baka lutumu na nzila ya Yandi na kukwenda na yinza nyonso mpe samu na kunata nsangu ya mbote yayi na muntu nyonso, ti Yandi kele moyo. Mpe wapi mutindu beto lenda sala yawu na nzila ya Ndinga kaka? Samu ya me sonama, “Nsangu ya mbote kwisaka kaka ve na nzila ya Ndinga, kasi na ngolo mpe kumonisama ya Mpeve-Santu, samu na kusiamisa ti Yandi kele moyo.”

⁶³ Ntangu yayi, kana ya kele na nsangu ya mbote yankaka, mutindu Paul tubaka na mosi ya bimvuka, “Mu me yituka mingi ti beno me pesa nsangu ya mbote yankaka.” Na yina ya kele ve na nsangu ya mbote yankaka, kasi ya kele nsangu ya mbote yina ba me sala, yina me luta na masolo ya ba-denomination, na kupesaka mukongo na nsangu yayi ya mbote.

⁶⁴ “Mpe samu mu ke moyo, beno mpe ke moyo. Mpe mu ke zinga na kati ya beno, mpe bisalu yina mu ke sala,” Jean 14:12, “bisalu yina mu ke sala ke talisa Munu mosi na kati ya beno.” Wapi mutindu ya Nsangu! Kuyituka ve, beto me kuzwa yinza ya mudidi ya théologie, kasi na ntangu ya nkokila Nsemo ke kwisa diaka. Ya ke vwanda na mvumbukulu na ntangu ya nkokila. Ya ke vwanda na Nsemo na ntangu ya nkokila.

⁶⁵ Ntangu yayi, mutindu ya Nsangu yina ba fidisaka, kele, “Yandi me vumbuka na lufwa,” beto bantu ya Yandi, beto yina ke kabulaka mvumbukulu na Yandi, beto ke baka bandandu na yayi, na kutalisaka na yinza ti Yandi kele moyo. Beto lendaka ve kusala yawu na ndinga kaka. Beto lendaka ve kusala yawu na nzila ya kinkulu ya muntu. Beto ke monisa kaka yina beto ke talisa na bantu.

⁶⁶ Mu ke na boma bubu yayi ti mingi na kati ya beto ke na kutwadisa ve bantu na Klisto. Beto ke twadisa bawu na dibuundu mosi, na luzabu. Kasi beto fwana twadisa bawu na Klisto. Yandi kele Mosi kaka, mpe Yandi kele na Luzingu. “Yandi yina kele na Mwana kele na Luzingu.”

⁶⁷ Mpe kana luzingu ya muntu yina kufwaka me kota na kati ya beno, beno ke zinga luzingu yina yandi zingaka.

⁶⁸ Kana menga ya muntu mosi vwandaka na kimvuka mosi, mpe beno baka menga na muntu mosi mpe beno soba menga ya muntu yina na yina yankaka, yandi ke vwanda kieleka na kimvuka ya menga yina.

69 Mpe kana mpeve ya beno yina kele na kati ya beno me talana mutindu ya kufwa, mpe beno me pakulama na Luzingu yina vwandaka na kati ya Klisto, ya kele na zulu ya beno! Romain 8:11 ke tuba, “Kana Mpeve yina vumbulaka Klisto na lufwa, kele na kati ya beno, Yawu ke kindisa diaka nzutu ya beno yina ke kufwa,” Luzingu ya mutindu mosi, bangolo ya mutindu mosi, bantu yina mosi, yina Yandi kuzwaka awa na zulu ya ntoto, yina katukaka na Nzambi. Yandi vulusaka beno, Nkuna yina Nzambi zabaka na ntwala, bayina ba tulaka bankumbu ya bawu na Buku ya Luzingu ya Mwana-dimeme na ntwala ya mbandukulu ya yinza.

70 Mpe Nsemo ya Nsangu ya mbote yayi ya mvumbukulu, kusiamisama ya Ndinga! Wapi mutindu beto zabaka ti Yandi vwandaka Klisto? Samu ti Yandi talisaka yina Yandi zonzaka. Wapi mutindu mu ke zaba Nsangu ya ngunga? Nzambi ke talisa yina Yandi silaka, mpe Yandi ke zonzila na yawu. Yina kele kutalisama, ti beto kele bantu na Yandi kati na mvumbukulu. Yandi ke talisa yina Yandi zonzaka.

71 Yina Yandi silaka na kusala na kati ya Klisto, Yandi me talisa yawu na mvumbukulu. Yina Yandi silaka na kusala na bilumbu ya Moïse, Yandi talisaka yawu. Yina Yandi silaka na bilumbu ya Enoch, Yandi talisaka yawu. Na bilumbu nionso ya bantumwa, Yandi talisaka yawu.

72 Ntangu yayi na kilumbu yayi, Yandi ke talisa yina Yandi tubaka, samu ti bawu kele kitini ya Nkuna yina ba talisaka na Buku ya Luzingu ti Yandi kwisaka samu na kuvulusa diaka na Nzambi. Oh, wapi Nsangu yayi!

73 Na suka ya Paki, Yandi vumbukaka ve kaka, kasi bantu ya Yandi vumbukaka na Yandi. Yandi . . . Ba vwandaka na kati ya Klisto na kulunsi ya Yandi. Ba vwandaka na kati ya Yandi na mvumbukulu ya Yandi. Beto kele bantu ya Yandi, me kindisama na manima ya kufwa na kati ya mudidi.

74 Yinza ya kuyuma ya kukondwa lukwikilu, kisika mabuundu mpe ba-denomination, mpe nionso yina, me basisa beto. Mpe ya kele na kima mosi na kati ya beto yina ke na kubokila, “Oh, beto zola Nzambi! Beto kele na nsatu mpe mpwila ya Nzambi.” Beto me vukana na ba-Methodiste, ba-Baptiste, ba-Pentecotiste, ba-Presbyterien, mpe nionso yina, kasi ya vwandaka kaka na kima mosi vwandaka tambula mbote ve, beto me kuzwa Yawu ntete ve. Mpe na mbala mosi, na yina beto vwandaka titiba na kati ya mpimpa, mvumbukulu ya nene kwisaka na beto na kumonisama ya Ndinga ya Nzambi ya nsilulu.

75 Mutindu, Yandi vwandaka kumonisama ya Ndinga ya Nzambi yina silamaka. “Mu ke bika ve moyo ya Yandi na difelo, to Mu ke bika ve Santu ya Munu kumona kubola.” Yandi monisaka Yawu, konso Ndinga ya Nzambi yina silamaka na

Yandi. Yandi siamisaka yawu ntangu Yandi vumbukaka na suka ya Paki.

⁷⁶ Ntangu yayi, bayina vwandaka titiba na kati ya mudidi mpe vwandaka kukiyufula bakiuvu ya mutindu na mutindu, kana ba lendaka sukula makulu na kilumbu *yayi*, to kana ba lendaka kuzitisa kilumbu mosi, to kuzitisa mwa misiku, bima yina nionso me lutaka. Na yina, ya vwandaka na mvumbukulu ya nkembo yina nungaka nionso yina vwandaka ya muntu mpe yina salamaka na muntu, mabanza nionso ya muntu.

⁷⁷ Ya me vwandaka ata fioti ve, tii na ntangu yayi, muntu yina lendaka pesa luzingu ya yandi mpe kubaka yawu diaka. Yandi nungaka nzikisa yina ya mayele ya bantu ba vwandaka na yawu, na kuvumbukaka diaka.

⁷⁸ Ntangu ba ke tuba, ti, “Yesu Klisto kele ve mutindu mosi mazono, bubu yayi, mpe kukonda nsuka,” ti, “Ngolo ya Yandi kele ve mutindu mosi,” ti, “Nsangu ya mbote ya Yandi kele ve mutindu mosi,” ntangu Biblia ke tuba ti Yawu kele mutindu mosi! Nzambi teleminaka konso denomination, konso credo, mpe Yandi kwendaka na Mpeve-Santu ya Yandi, mutindu Yandi silaka, mpe me lakisa yawu na beto, ti Yandi kele moyo.

⁷⁹ Beto kele bantu ya mvumbukulu ya Yandi, yina kindisamaka na manima kufwa na yinza, na disumu mpe bayimbi ya beto. “Yandi me kindisa beto kintwadi na Yandi, me vumbuka na Yandi, ntangu yayi ya kuvwanda na bisika ya Mazulu kati na Klisto Yesu.” Yandi ke nata . . .

⁸⁰ Mpeve ya Yandi ke nataka diaka Luzingu ya Yandi na zulu ya ntoto. “Kana Mpeve ya Nzambi, yina vumbulaka Klisto,” nzutu, nzutu ya kupakulama; kana Mpeve ya Nzambi pakulaka nzutu yango na mutindu yina, ntangu Nkuna yango kubwaka na ntoto, Yandi zolaka kaka ve kubika Yandi kupema kuna. Ve. Yandi kindisaka Yandi mpe vumbulaka Yandi na lufwa. “Mpeve yina mosi,” na nzila ya bisalu ya mutindu mosi, na nzila ya Ngolo ya mutindu mosi, na nzila ya bidimbu ya mutindu mosi, “kele na kati ya beno, Yawu ke vumbula beno diaka.”

⁸¹ Mu ke zola kutanga mwa Masonuku awa samu na beno. Mu ke zola ti beno baka Masonuku yankaka mu me sonika awa. Ya lendaka sadisa beno fioti. Ya ke na kati ya Buku ya Lévitique, kapu 23, nzila ya 9 tii na nzila ya 11. Beno kuwa mbote-mbote. Na musiku, musiku ya Levi, Nzambi vwandaka tuba na Moïse. Beno kuwa. Bima nyonso yayi kele bifwanukusu ntangu yayi, mpe beto ke sukisa awa mwa ntangu fyoti samu na kukota na kifwanukusu yayi.

Mpe MFUMU zonzaka na Moïse, na kutubaka,

Tuba na bana ya Israel, mpe tuba na bawu, Ntangu beno . . . ke kwisa na yinsi yina mu ke pesa beno, . . .

82 “Ke kuma na kisika yina, na kisika yango, yina mu pesaka na beno. Ntangu yayi nge ke tuba na bana ya Israel, ti ntangu beno ke kuma na kisika yayi mu silaka beno ti Mu ke pesa beno, ntangu beno ke kuma kuna na yinsi yina.” Ntangu yayi beto ke tubila ya kimuntu awa, samu na kufwanikisa ya kimpeve.

. . . mpe ke buka bambuma ya yawu (beno me kuzwa yina mu tubaka na beno), na yina beno ke nata na nganga-Nzambi mbuma ya bambuma ya ntete ya bambuma ya beno:

Mpe yandi ke ningisa mbuma na ntwala ya MFUMU, samu ya ndimama samu na beno: kilumbu ke landa na manima ya saba nganga-Nzambi ke ningisa yawu.

83 Kana ya ke vwanda na ntumunu mosi ya santu, ya ke vwanda na kilumbu ya saba, yina vwandaka kilumbu ya sambwadi ya sabala, yina kele Kilumbu ya sambanu. Kasi beno me bakula, na lubambuku yayi, samu na kuningisa yawu na kilumbu ya ntete ya sabala?

84 “Mbuma, yina vwandaka nkuna ya ntete yina beno kunaka, ntangu ya ke basika mpe ke tela, beno ke zenga mbuma yayi mpe beno ke nata yawu na nganga-Nzambi. Mpe bika yandi baka yawu mpe yandi ningisa yawu na ntwala ya Mfumu, samu na kundima beno, ti beno me ndimama. Beno fwana kwisa na mbuma ya beno, mpe yandi ke ningisa yawu na ntwala ya Mfumu, na . . .”

85 Na saba ve, na kilumbu ya sambwadi ve; kasi na kilumbu ya ntete, yina ba ke bokilaka Lumingu, L-u-m-i-n-g-u [Na Kingelezi S-u-n-d-a-y—Mu.]

86 Na yina, ya kele mpova ya ba-Romain, ba vwandaka bokila yawu kilumbu ya mwini samu na nzambi mwini. Kasi wapi mutindu ba me soba yawu!

87 Ya kele ve s-u-n [m-w-i-n-i] diaka. Ya kele S-o-n-d-a-y [k-i-l-u-m-b-u ya M-w-a-n-a—Mu.] kilumbu ya Mwana, kisika yina mbuma yina ya Blé (Ya ntete na kati ya bayina kele ya Nzambi yina me vumbuka na kati ya bantu ya bantu ya kufwa) ba ke ningisa yawu na zulu ya dibuundu, ti beto kele Nkuna ya Yandi; mpe yawu yina Nkuna ya ntete ya bayina lalaka, yina ba ningisaka na kilumbu ya ntete ya sabala. Na Lumingu, Yandi vumbukaka. Ya ningisaka yawu samu na kupesa mbote ya nsuka, mpe zangukaka na Zulu, na ntwala ya bantu.

88 Beno tala, Ya vwandaka mbuma ya ntete ya Blé ya Nzambi yina vumbukaka na lufwa, mbuma ya ntete ya Blé ya Nzambi. Na Ngolo ya nkindusulu ya Nzambi, Nzambi me kindisa Yandi, me vumbula Yandi na lufwa, mpe Yandi vwandaka Bambuma ya ntete ya bayina lalaka, Mbuma ya ntete. Yandi vwandaka Mbuma yina.

⁸⁹ Yawu yina ba zolaka kuningisa mbuma yina, samu yawu vwandaka ya ntete yina yelaka. Mpe ya vwandaka ya kukubama mutindu lubambuku ya kuvutula matondo na Nzambi, na kukwikilaka ti bayankaka na kati ya bawu ke kwiza. Ya vwandaka kidimbu.

⁹⁰ Mpe, bubu yayi, samu Yandi vwandaka Mwana ya ntete ya Nzambi na kuyela, samu na kuvwanda kati na Nzambi, ba katulaka Yandi na ntoto mpe ba ningisaka Yandi na zulu ya bantu. Oh, wapi dilongi ya nkembo! Na Ngolo ya nkindusulu, Yina ya ntete! Na yina, Yandi vwandaka—Yandi vwandaka kifwanukusu; mpe na bambala mingi, mutindu Yandi vwandaka kifwanukusu. Kasi yayi vwandaka kieleka Mbuma ya ntete na kati ya bayina lalaka. Ba ningisaka Yandi na zulu ya Nkuna ya Nsilulu yina kuzwaka nsilulu ya Luzingu.

⁹¹ Ba ningisaka Yandi na Kilumbu ya Pentecote, “ntangu wakanaka makelele na Mazulu mutindu kuningana mosi, mutindu mupepe ya ngolo,” mpe ba ningisaka Yandi na zulu ya bantu, bantu ya pentecote yina vwandaka na zulu kuna na Pentecote, ba vwandaka vingila Lusakumunu kukwisa.

⁹² Mpe beto me bakula yawu diaka, beto ke mona, na kilumbu ya nsuka, landila Luc 17:30, na kilumbu ya Mwana diaka, “na kilumbu yina M-w-a-n-a ya muntu ke talisama,” to ba ke ningisa Yandi diaka na zulu ya bantu.

⁹³ Ntangu yayi, Nani kele Mwana ya muntu? “Na mbandukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi. Mpe Ndinga kumaka muntu, mpe zingaka na kati ya beto.” Mpe kana malongi nionso beto ke na yawu, mpe kusiamisa Ndinga ya Nzambi; na nzila ya Ndinga ya Nzambi, na nzila ya bidimbu, na nzila ya mambu ya ngitukulu, beto ke mona bubu yayi, ti na Buku ya—ya Luc awa, ti mutindu beto me tanga yawu, to Luc kapu ya 17 mpe nzila ya 30; mpe Malachie 4, mpe Masonuku ya luswaswanu yina beto me zaba, ti ba me ningisa diaka Ndinga yina na zulu ya bantu, ti binkulu ya kufwa ya bantu kele ya kufwa, mpe Mwana ya Nzambi kele dyaka moyo na mbotika ya Mpeve-Santu kaka na kati-kati ya beto, mpe ke pesa beto Luzingu.

⁹⁴ Mutindu Klisto vwandaka Yina ya ntete na kuvumbuka, na bapofete nionso, mpe nyonso yina; ata ti ba me talisa na bisika mingi, Yandi vwandaka Bambuma ya ntete ya bayina lalaka. Na Kento ya makwela, yina me kwiza na Klisto, yina me basika na dibuundu, ya ke vwanda na Mbuma yina ba ke ningisa diaka na bilumbu ya nsuka. Oh, la la!

⁹⁵ Kuningana ya mbuma! Yinki vwandaka mbuma? Yina ya ntete yina yelaka, ya ntete yina talisamaka ti ya vwandaka blé, yina talisamaka ti ya vwandaka mbuma.

⁹⁶ Alleluia! Mu ke ndima ti beno ke mona yina mu ke tubila. Ba ningisaka Yawu na zulu ya bantu. Mpe samu na mbala ya

ntete yina ke vwanda, samu na nsungi ya Kento ya makwela, kubasisa mudidi na systeme ya ba-denomination, samu na kunata Nsangu, kuyela ya muvimba ya Ndinga me vutuka diaka na Ngolo ya Yawu ya muvimba, mpe ba ningisaka yandi na zulu ya bantu, na nzila ya bidimbu mosi mpe mambu ya ngitukulu yina Yandi salaka kuna.

⁹⁷ “Samu ti mu ke zinga, beno mpe ke zinga,” na kuzonzaka na Kento ya Yandi. “Samu mu ke zinga, beno mpe ke zinga.” Yinki mvumbukulu yina vwandaka! Mpe yina ke vwanda mvumbukulu, samu na kukindisama na lufwa, “samu na kuvwanda ya moyo kati na Klisto Yesu,” na nzila ya Ngolo ya nkindusulu ya Nzambi!

⁹⁸ Ba ningisaka yandi na bawu. Ndinga, yina Yandi vwandaka, ba ningisaka Yawu na bawu na Kilumbu ya Pentecote, Ndinga monisamaka. Ntangu yayi, mpe mutindu mu ke tuba, ba fwana katula yawu diaka na kilumbu ya nsuka. Ntangu yayi, mutindu . . .

⁹⁹ Beno ke tuba, “Mbote, ntangu yayi, vingila fioti, Mpangi Branham. Mu zaba dibuundu yina . . .” Mbote, mu me sala yawu, mpe. Beno me mona?

¹⁰⁰ Kasi ntangu yayi, mutindu, yinki kana—kana beto ke vutuka na Tucson na manima ya midi yayi, ntangu yayi, mpe mosi na mosi ya beto zolaka . . . zolaka kota na ba-Cadillac ya nene, ya malu-malu? Mpe bakiti nionso ke salaka na—na mpusu ya kulutula kitoko, na mpusu ya kulebakana, ya lembami mpe ya kitoko na kuvwanda; mpe mabaya ya kuyidika kitoko; volant ya kuyidika kitoko na nickel mpe na bansonso ya kitoko bisika nionso na zulu ya yawu; mpe ba me meka moteur mbote-mbote na mutindu ya mekaniki; mpe bapiné vwandaka na . . . na ba-roulement nionso mpe ya kutula mafuta mbote-mbote; mpe ba me teza ngolo ya bapiné nionso na kutoboka mpe ba me tala kana ya ke panzana ve; mpe ba me teza nionso landila luzabu ya bantu.

¹⁰¹ Ya zolaka basika na chaîne de montage, nionso zole, ba zolaka fulusa ba-reservoir na essence na nionso zole. Ya kele ngolo ya moteur, essence, samu na kati ya yawu kele octane. Kasi ntangu yayi na yina beno ke banda yawu, ata ti bawu zole ke monana kaka mutindu mosi, kasi ya kele na mosi na kati ya yawu kele ve na mingenzi, ata ngolo ya kupelisa tiya ve.

¹⁰² “Mbote,” beno ke tuba, “ngolo kele na essence, Mpangi Branham.” Kasi mu ke kipe ve wapi mutindu essence kele ngolo; kana essence kele ve kuna samu na kutalisa ngolo yina, kana ngolo kele ve kuna samu na kusiamisa essence ti ya kele essence, ya lendaka vwanda masa. Tii kuna . . .

¹⁰³ Mu ke kipe ve yina nionso ba-théologien lendaka tuba, mutindu mbote dibuundu ya beno lendaka vwanda, lutangu ya ndongosolo kele na beno, wapi mutindu ya kele ya kusungama

na Biblia; tii kuna Mbuma yina ba me ningisa, tii kuna Mpeve-Santu ke kwisa na zulu ya muntu yina samu na kukindisa Ndinga yayi! Lusanse ke monikisa Ndinga. Ya kele Kieleka; kasi, kukondwa Mpeve, Yawu ke ningana ve.

¹⁰⁴ Beto me tula kivuvu mingi na Mekaniki kasi na Dynamique ve. Ya ke na nsatu ya Ngolo ya dynamique ya Nzambi, Ngolo ya mvumbukulu ya Yesu Klisto na zulu ya Dibuundu, samu na kutalisa mpe kusiamisa ti *Yayi* kele essence. Ya lendaka vwanda na bidon ya essence; kasi ya lendaka vwanda masa, beno me mona. Kasi kidimbu mosi kaka ya yawu, kele, kutula Luzingu yayi na zulu ya yawu, mpe Yawu ke talisa kana yawu kele essence to ve.

¹⁰⁵ Mpe ntangu beno ke meka na kutula Mpeve-Santu na kati ya denomination, ya kele mutindu beno ke meka . . . Beno lenda kuzwa ntangu yankaka kukangama ya masini; beno ke bebisa masini ya beno, na kufulusaka yawu na carbone.

¹⁰⁶ Kasi, oh, mu kele na kiese ti ya ke na mafunda kumi ya mafunda ya Ngolo ya octane, Ndinga ya Nzambi mpe Mpeve-Santu samu na kupelisa Yawu, mpe samu na kuvumbula Ngolo ya Nzambi na luzingu ya bakala mosi, to na luzingu ya kento mosi, to na dibuundu mosi. Yawu yina losaka Cadillac yina kuna na nsi na bala-bala, na nsi ya Ngolo ya dynamique ya Mpeve-Santu yina me vutuka mpe ba ningisaka na zulu ya bantu na Kilumbu ya Pentecote, samu na kusala Yandi mutindu mosi mazono, bubu yayi, mpe kukonda nsuka.

¹⁰⁷ Yawu yina Mbuma ya ntete basikaka na kati ya baprofete nionso, yina vwandaka Mwana ya Nzambi, Ntinu ya baprofete nionso.

¹⁰⁸ Ya vwandaka na mabuundu, mabuundu, bakento ya makwela, bakento ya makwela, mabuundu, bakento ya makwela, bakento ya makwela.

¹⁰⁹ Kasi Mosi fwana kwisa! Alleluia! Kento ya makwela ya kieleka fwana kwisa! Mosi fwana kwisa yina kele ve kaka na Mekaniki, kasi na Dynamique ya Yawu, yina ke sala ti Dibuundu kuzinga, kukota na Ngolo ya mvumbukulu ya Yandi. Tii kuna beto ke kuma na kisika yina, tii kuna beto ke mona kisika yina, wapi mbote ya ke sala na kutula mafuta na bamwaye? Wapi mbote ya ke sala na kuyidika carrosserie to kungengisa yawu, kana Dynamique kele ve na kati ya yawu? Ata ti Mekaniki me talisa ti ya kele mbote, ya fwana vwanda na Dynamique samu ti Yawu kusala.

¹¹⁰ Yawu yina Yandi siamisaka! Alleluia! Yawu yina Paki me talisa. Yandi vwandaka kaka Ndinga ve, kasi Yandi vwandaka Nzambi Yandi mosi, Dynamique, kati na Ndinga. Yina salaka nzutu ya Yesu Klisto (madidi, kukangama, mpe kufwa, na kati ya ntoni) ninganaka na Luzingu mpe vumbukaka diaka, mpe balulaka ditadi. "Mu kele Yandi yina kufwaka," na yina mwini

tubaka ti Yandi me kufwa, ngonda tubaka ti Yandi me kufwa, bambwetete tubaka ti Yandi me kufwa. Yinza nyonso ke tuba ti Yandi vwandaka ya kufwa. Mpe ntangu yayi yinza ya muvimba fwana zaba ti Yandi ke zinga dyaka. Yandi vwandaka kaka Mekaniki ve, Ndinga ya Nzambi, Yandi vwandaka Dynamique samu na kusiamisa Yawu.

¹¹¹ Mpe mutindu Yandi, kele Bakala ya makwela, Kento ya makwela fwana vumbuka, samu ti Yandi kele kitini ya Yandi. Mpe Yandi lendaka vwanda kaka kutalisama ya kumonisama ya kulungisama ya baluzayikisu nionso bayankaka tubaka samu na Kento ya makwela; Ya lendaka kaka kutalisa. Kana ya ke sala kima ya kuswaswana na Bakala ya makwela, ya kele ve Kento ya makwela. Samu, Yandi kele nsuni ya nsuni ya Yandi, mukwa ya mukwa ya Yandi; Luzingu ya Luzingu ya Yandi, Ngolo ya Ngolo ya Yandi! Yandi kele Yandi! Mutindu bakala mpe kento kele muntu mosi, mpe kento me basika na lweka ya yandi; Yandi me baka Mpeve, Mpeve ya bukento, na Yandi. Nsuni ya lweka ya Yandi, me sala nionso zole Mekaniki mpe Dynamique, Kento ya Yandi. Mpeve ya Yandi mpe nzutu ya Yandi, mpe tulaka yawu kintwadi, mpe salaka Mekaniki mpe Dynamique. Tii kuna dibuundu to bantu. . .

¹¹² Bima yina nionso, ba-lapin ya Paki, mpe mikembo, mpe mabuundu ya nene, mpe bakitoko ya nganda, ke suka mpe ke zimbana.

¹¹³ Tii kuna Dibuundu yina ke kuma nionso zole Dynamique mpe Mekaniki; mpe Mpeve ya Nzambi, yina vwandaka tambula na Yandi, samu na kusala bima yina Yandi salaka! Kana na Yandi ba-cylindre kumi na sambanu vwandaka sala, Kento ya makwela ke vwanda mutindu yina. Amen! Samu ti Yandi tubaka, na Jean 14:12, “Yandi yina ke kwikila na Munu, yandi mpe ke sala bisalu yina Mu ke sala. Mu ke pesa yandi kiyeka ya Dynamique ya Munu, na Mekaniki ya yandi, ti yinza ke vwanda ve na kiyeka ya kutelemina yawu; mpe mu ke vumbula dyaka yandi na kilumbu ya nsuka.” Yayi Nsangu ya Paki, Dynamique mpe Mekaniki, kintwadi! Mekaniki kukondwa Dynamique, kele na mfunu ve; Dynamique mpe, kukondwa Mekaniki.

¹¹⁴ Beno lendaka boka mpe kusala makelele, mpe kudumuka mpe kukulumuka, nionso yina beno zola, mpe kumanga Ndinga yayi, yawu ke sala ata mbote ve. Beno ke lembisa manivelle samu na kubalula ba-piston ya . . . Mingenzi kele kuna samu na kupesa tiya, kasi essence kele ve samu na kupesa tiya.

¹¹⁵ Ya ke sala kaka ntangu nionso zole ke vukana. Amen! Na yina, mosi ke vwanda swi, mpe Mosi yankaka ke mata. Ya kele kaka kukondwa mpasi. Kasi, nionso zole lendaka fwanana, nionso zole lendaka tuba ba kele mabuundu, nionso zole lendaka tuba ti ba kele Kento ya makwela. Kasi Mosi kele na Mekaniki

mpe Dynamique, Yina ke talisa, ti yina Yandi tubaka kele Kieleka.

¹¹⁶ Ya ke ningana kaka ve, ata ti Mekaniki kele mbote, tii kuna Dynamique ke kwisa. Ntangu Dynamique ke kwisa, Tiya yina ke vukana na octane ya essence. Mpe ntangu Yawu ke panzana, ya ke nata tiya, mpe tiya yina ke tambusa bamasini nionso, mpe ba-mouvement nionso, samu Yandi kele mutindu mosi mazono, bubu yayi, mpe kukonda nsuka. Yawu yina mvumbukulu. Yawu yina Ngolo ya kieleka ya Nzambi, Mekaniki na Dynamique. Beno tala, “Ya kele Mpeve yina ke kindisaka.” Ya kele—ya kele Mingenzi yina ke pesaka tiya. Ya kele ve essence yina ke pesaka tiya; ya kele Mingenzi yina pelisaka essence. Beno me mona?

¹¹⁷ “Beno lenda ve kusala kima kukondwa Munu; kasi na Munu beno lenda sala bima nionso.” Mutindu Yandi kele Ndinga, Ya kele Tata yina ke na kuzinga. “Tata me fidisa Munu, samu ti Mu me fidisa beno. Mutindu Tata ke pelisa tiya na Munu mpe me pusa Munu na nyonso, Mu ke salaka kaka yina ke sepelisaka Nzambi. Ntangu yayi, mutindu Yandi fidisaka Munu, na yina Mu ke fidisa beno na Mekaniki ya mutindu mosi, mpe ya ke lomba Dynamique ya mutindu mosi samu na kusadisa Yawu. Mpe bidimbu yayi ke landa bayina ke tubaka ti ba kele na Mekaniki. Dynamique ke baka kisika ya Yawu.”

¹¹⁸ Paul tubaka, “Nsangu ya mbote kwisaka kaka ve na Ndinga,” na essence kaka, “kasi na Mingenzi diaka,” samu na kutambusa Yawu. Yawu yina. Ya me kwisa na beto mutindu yina.

¹¹⁹ Yawu kele Mpeve mosi, yina vumbulaka Yandi, yina kindisaka mukwikidi ya kieleka tii na Luzingu ya Kukonda nsuka. Ntangu yayi beno bambuka moyo, na mudindu mingi. . . Ntangu yayi beno tala mbote, na yina beto ke na kubakula ntangu ya beto. Beno tala, “Mpeve mosi,” ntangu yayi, ba-Romain 8:1. Ntangu yayi beto tanga dyaka yawu, na ba-Romain 8:1, mpe beto ke mona yinki ya ke tuba. Mbote mingi. Mpe ve ba-Romain. . . mu zola kutuba, 8:11, beno lemvokila munu.

¹²⁰ Na ba-Romain 8:11, “Kasi *kana* . . .” Yawu yina diambu. Ya ke kisika Yina ya ke sala mpasi.

*Kasi kana Mpeve ya yandi (Nzambi, Mpeve-Santu)
yina vumbulaka Yesu na lufwa ke zingaka na kati ya
beno, . . .*

¹²¹ Ntangu yayi, beno bawu yayi, “Kana Mpeve ya Bakala ya makwela ke zinga na kati ya Kento ya makwela!”

¹²² Ntangu Nzambi salaka bakala ya Yandi ya ntete ya makwela, Yandi salaka ntete bakala ya makwela, mpe yandi vwandaka nionso zole bakala mpe kento, na mpeve; salaka yandi na kati ya putulu ya ntoto, samu na kusala ti yandi kumonana. Mpe beno tala ntangu Yandi salaka Eve, na Adam, Yandi bakaka ve kitini yankaka ya ntoto, Yandi bakaka kitini ya ntoto yina

mosi; Ndinga mosi, samu ti Adam vwandaka Ndinga yina ba me zonza. Beno me mona? Yandi bakaka na yandi, na manima yandi bakaka . . . Yandi vwandaka na mpeve ya bubakala mpe bukento. Mpe Yandi katulaka mpeve ya bukento na Adam, mpe tulaka yawu na kati ya Eve; na yawu ya kele dyaka kitini ya mpeve ya Adam, ya kele nsuni ya Adam. Na yina, ya vwandaka mpeve ya Adam, ngolo, yina kindisaka mekaniki na nzutu ya yandi.

¹²³ Na yina Kento ya makwela fwana vwanda diaka nsuni ya nsuni ya Yandi, mpe mukwa ya mukwa ya Yandi. Na yina wapi mutindu nsuni yayi ya lufwa ke kuma nsuni ya Yandi? Beto ke kuma na yawu na minuti mosi, beno me mona. Wapi mutindu ya me salama? Wapi mutindu? Yinki kele nsobolo ya nene? Beno tala.

Ntangu yayi kana Mpeve ya yandi (Nzambi) yina vumbulaka Yesu na lufwa ke zinga na kati ya beno, yandi yina vumbulaka Klisto na lufwa ke pesa diaka luzingu banzutu ya beno yina ke kufwa na nzila ya Mpeve ya yandi yina ke zingaka na kati ya beno.

¹²⁴ Oh, la la! Yina zabanaka na ntwala, ya kieleka, mutindu Nkuna vwandaka na zulu ya ntoto, Mosi yina vwandaka na Luzingu na kati ya yawu. Mingi kati ya bawu vwandaka ya kufwa; bawu vwandaka kaka nkuna ya kubola; bamasu mpe bima vwandaka yoka yawu. Kasi, beno zaba, ya vwandaka na Nkuna mosi yina vwandaka kuna ya kukubama samu na Luzingu. Nzambi zabaka ti Yawu vwandaka ya kulala kuna.

¹²⁵ Ntangu yayi, Bayina ba zabaka na ntwala kele ya ntete yina ba me kindisa na Mpeve-Santu, samu Mpeve-Santu ke kwisa samu na kulomba Bantu ya Yandi. Ntangu yayi, yayi kele ya mudindu ntangu yayi, mpe beno sala keba na kusimba yayi mbote.

¹²⁶ Ntangu yayi, mutindu ba fidisaka mwini na zulu ya ntoto, samu na kunata ve matadi, yina vwandaka me salama na ntoto mpe, na luzingu, ya zolaka ve kuzingisa yina nionso salamaka na ntoto, kasi samu na kuzingisa kitini ya ntoto yina vwandaka ya kukangama na luzingu.

¹²⁷ Bantu nyonso ve ke ndima Klisto. Oh, ve. Kasi bayina Nzambi tumaka na ntwala na Luzingu, yina kele ya kukangama na kitini yina ya putulu ya ntoto, ya kele Yandi yina Yandi ke kindisa. Ya kele Bawu yina.

¹²⁸ Ti, ntangu yayi, ntoto yina ke vwanda kuna na mwini, mpe ke tuba, "Oh, mwini yayi ya ntama kele tiya mingi!" Ditadi yina, beno tuba, "Mwini yayi ya ntama kele tiya mingi!" Kasi mwa mbuma yina, tubaka, "Yawu yina mu ke sosa," mpe yawu me banda na kubaka luzingu. Ya me kindisa kitini yina ya ntoto. Samu, ba fidisaka mwini samu na kukindisa ve ditadi, samu na kukindisa ve ntoto, kasi samu na kukindisa luzingu ya nkuna.

129 Ntangu yayi, Mpeve-Santu ke kwisa ntangu yayi. Ya kieleka, ba fidisaka Yawu ve. . . Samu na yinki bantu nyonso ke ndima Yawu ve? Ba fidisaka yawu ve na bawu.

130 Bakala mosi tubaka na munu, “Mu ke kwikila ve. Mu ke kipe ve yina nge ke tuba. Kana beno lenda vumbula bantu ya kufwa, to nyonso yina, mpe kubelula bambevo; mpe kusiamisa Yawu, na mutindu nyonso; mu ke kwikila Yawu kaka ve.”

131 Mu tubaka, “Ya kieleka ve. Nge kele muntu ya kukondwa lukwikilu. Ya ke tuba kima mosi ve samu na nge. Ba fidisaka yawu ve samu na nge. Ba fidisaka yawu na bayina ke kwikila.”

132 Nsangu kele samu na mukwikidi. Samu na bayina ke kufwa, Ya kele bulawu; kasi samu na bayina kele kati na Klisto, mpe kitini ya Nkuna yina, Ya kele Luzingu.

133 Mwa disolo ya munu ya mwa ntama mu ke zonzaka samu na fermier yina tulaka diki mosi na nsi, to diki ya ngononi na nsi ya nsusu. Beno me mona? Mwana ngononi yayi ya fioti vwandaka, kieleka, yandi vwandaka—yandi vwandaka kivangu mosi, ya ngitukulu. Ntangu fermier yayi salaka kima yina yandi salaka, samu na kutula diki ya ngononi yayi na nsi ya nsusu yayi ya kiboba. Mpe yandi pasulaka mwana ya nsusu ya ngitukulu, mpe ya vwandaka—ya vwandaka kivangu ya fioti, ya ngitukulu. Yandi vwandaka ve mutindu mosi na bawu. Mapapu ya yandi vwandaka ve mutindu bayankaka, mpe yandi—yandi kaka. . . Yandi vwandaka mwana-bakala, ya ngitukulu. Mpe bana-bansusu yankaka nionso zabaka ti yandi kivangu ya ngitukulu. Mpe nsusu ya kento kwendaka kuna. . .

134 Yandi vwandaka zola ve madia yina yandi vwandaka pesa yandi. Yandi vwandaka ve na dibanza ya kusandula ntoto na kati ya lupangu. Yandi, yandi vwandaka ve na kima ya kusala na yawu. Na yawu yandi kukiyufulaka samu na yinki yandi lendaka vwanza ya ngitukulu kuna, na mutindu nionso. Beno me mona? Mpe yandi vwandaka meka yawu ata fioti ve. . . Yandi vwandaka kudia kaka mingi samu na kuvwanda na luzingu, samu yandi vwandaka zola ve ntomo ya yawu, beno me mona. Samu, yandi vwandaka nsusu ve, na kubanda. Beno me mona?

135 Mpe nsusu lendaka sala makelele, mpe, beno zaba, “Bilumbu ya bimangu me lutaka. Kima ya mutindu yina ve. Beno kota na dibuundu.” Ya vwandaka simba ve, na mwana-bakala yayi. Na yina yandi landaka nsusu yayi ya kento tii kuna kilumbu mosi mama ya yandi. . .

136 Ngononi ya kiboba zabaka ti yandi vwandaka na maki mingi, mpe kuna vwandaka na mosi yina vwandaka kondwa. Yandi zabaka ti ngononi yina vwandaka kisika mosi kuna, na yina yandi bandaka na kusosa yandi. Mpe yandi ziungaka kuna na nsongi ya mongo, mpe na nsi kuna na biwanda, mpe bisika nionso yandi lendaka vwanza. Ntangu yayi, yandi, ya kwisaka ntangu samu yandi butuka. Ya kwisaka ntangu samu

yandi basika na diki. Yandi tubaka, “Ntangu yankaka ngoy-ngoy kwisaka mpe bakaka diki ya munu; ntangu yankaka kokombe. Mu zaba ve. Kima mosi bakaka diki ya munu. Kasi mu zaba . . . Diki yina kele na dibanza ya munu. Mu kuzwaka mwana mosi sika mosi kuna. Mu fwana kwenda sosa yandi.”

¹³⁷ Mutindu mosi Nzambi ke salaka yawu. Yandi kele Ngononi yina ya Nene. Na kati ya mabanza ya Yandi Yandi zabaka ti Yandi ke vwanda na Dibuundu. Yandi zabaka ti Yandi ke kuzwa bantu. Ata ti ba me kangama konso kisika yina, ata ti ba me pasuka konso kisika yina, Yandi ke sosa. Yandi ke na kusosa Bantu ya Yandi.

¹³⁸ Mpe kilumbu mosi, disolo landilaka, ngononi yayi ya kiboba pumbukaka na zulu ya lupangu ya bansusu. Yandi vwandaka tala bisika nionso, mpe yandi monaka yandi. Oh, samu na mvumbukulu yina, samu na kuzaba ti yandi vwandaka nsusu ve, na manima ya nionso. Yandi vwandaka ngononi! Mpe ba longusaka yandi ntangu nionso na kutala na nsi, samu na kusosa nzinzi mosi to kima mosi na kati ya lupangu ya bansusu. Kasi yandi kuwaka kuboka mosi, yina tubaka, “Tala na zulu na lweka *yayi!*” Mpe yandi talaka na zulu ya yandi, mpe ya vwandaka na kivangu mosi na mapapu ya nene ya ba-metre yiya na makumi zole na sambwadi, ya ngolo mingi kulutila bana-bansusu nionso yina vwandaka na kati ya lupangu, ya vwandaka tuba ti ya vwandaka mwana ya yandi.

Yandi tubaka, “Mama, wapi mutindu mu lenda kuma na nge?”

¹³⁹ Yandi tubaka, “Dumuka, banda na kubula mapapu ya nge, samu nge kele ngononi.”

¹⁴⁰ Beno me mona, yandi zabaka ti yandi vwandaka na mwana kisika mosi kuna. Ata ti ya me kuyela kuna, yandi kele na mwana kisika mosi kuna.

¹⁴¹ Mpe Nzambi zaba! Alleluia! Yandi kele na Dibuundu yina ba soolaka na ntwala, yina ba kubikaka na ntwala! Yandi zabaka ti Yandi kele na bana ya babakala mpe bana ya bakento, mpe Kento ya makwela, ke na kvingilaka kisika mosi kuna; ntangu Mpeve-Santu ke banda na kudumuka na zulu ya yawu, Mbuma yayi ba me ningisa. Oh, la la! Yandi ke mutindu mosi mazono, bubu yayi, mpe kukonda nsuka. Disolo ya luvunu ve, kasi ya kele kieleka!

¹⁴² Ata lutangu ya bantu mekaka na kutuba na yandi, samu na “ngononi,” yandi zabaka ve yina ngononi vwandaka. Kasi, yandi vwandaka ngononi. Yandi lendaka ve kubakula yawu tii yandi monaka kima yina vwandaka talisa yandi, yina yandi vwandaka talisa, mu zola kutuba.

¹⁴³ Mpe ntangu beto ke mona, denomination ve, Doctorat na Philosophie ve, Doctorat na droit ve, nkalani ya mbote ve; kasi mwana ya Nzambi me salama na kifwani ya Nzambi, na Ngolo

ya Dynamique ya Nzambi samu na kupesa mvutu na lombilu ya bubu yayi, ti Yandi kele mutindu mosi mazono, bubu yayi, mpe kukonda nsuka, ya kele ve na nsusu yina ke kanga beno. Yandi ke sosa Mama ya yandi. Yandi kele ngononi, na kubanda. Yandi zaba. Ngononi ya kieleka yayi ke na kuzaba lubokilu ya Ndinga ya Nzambi. Samu na yinki? Yandi kele ngononi. Ngononi ke tuba na ngononi! Ndinga na ntwala ya mbandukulu, Ndinga samu na Ndinga! Ndinga, yina ba zabaka na ntwala, Ndinga yina ba sonikaka samu na ngunga yayi. Beno ke bakula kisika ya beno. Yandi vwandaka sosa Yawu.

¹⁴⁴ Nzutu yayi, ya ntoto, ba me kindisa yawu mpe ba me nata yawu na nzila ya nkindusulu ya Mpeve ya Nzambi na kutumama na Ndinga ya Nzambi.

¹⁴⁵ Na nswalu nionso. Ntangu yandi zolaka kuzaba wapi mutindu yandi lendaka kukuma kuna na yandi, ba longusaka yandi ti yandi lendaka ve kusala yawu. “Benolendaka ve kuzanguka na zulu mingi ti nge lendaka dumuka.” Yandi kele nsusu. Beno me mona?

Kasi ngononi yayi tubaka, “Ya kele ve mutindu yina.”

“Mbote, tala bansusu!”

¹⁴⁶ “Mu ke kipe ve yina bansusu kele, nge kele ngononi. Banda kaka na kupanza mapapu yina, mpe sala mwa bangalasisa na yawu. Banda na kukwenda!”

¹⁴⁷ Ndinga na Ndinga! “Benolmpe ke sala bisalu yina Mu ke sala. Yandi yina ke kwikila na Munu, bisalu yina Mu ke sala yandi mpe ke sala yawu.” Beno me mona? “Samu Mu ke zinga, yandi mpe ke zinga.” “Mpe kana Mpeve yina vumbulaka Yandi na lufwa ke zinga na kati ya beno, Yawu ke pesa luzingu na nzutu ya beno yina ke kufwa.” Beno me mona?

¹⁴⁸ Yinki Yawu ke sala? Ntangu yayi beno kuwa, samu ti beno kuzaba. Mpe na Paki yayi, mu ke zola kutuba na beno mingi kulutula ba-Paki yankaka. Beno me mona? Mu ke zola ti beno mona yawu. Beto zaba yina Yawu salaka samu na Yandi; kasi mu zola ti beno mona yawu, ve, Ya me sala kima mutindu mosi samu na beno. Beno me mona? Yinki Yawu ke sala? Ya ke pesa luzingu na nzutu yina ke kufwa. Nzutu yayi ke kufwa yina beto ke na kuzingila, Yawu ke kindisa yawu, na nzonzolo yankaka, ya ke nata yawu na Luzingu.

¹⁴⁹ Ntangu yayi, beno yina mbala mosi me tambula na fumu ya nene na yinwa ya beno, mpe nyonso yankaka, to kinkuku ya makaya; mpe beno bakento yina vwandaka na bansuki ya nkufi, vwandaka pakula, vwandaka sala nionso yina, mpe beno vwandaka lwata bakupé, mpe bima ya mutindu yina; na mbala mosi, Kima mosi bokaka, mpe beno talaka awa mpe Yawu vwandaka Ndinga. Beno me mona, Yawu kindisaka luzingu ya beno. . . Beno ke tuba, “Mu ke lwata diaka ve bakupé, mu ke kunwa diaka ve alkole, mu ke yiba diaka ve, mu ke sala diaka

ve *yayi, yina.*” Beno me mona? Mpeve yina vumbulaka Yandi na lufwa, yina vwandaka zinga na kati ya beno, ke nata diaka banzutu ya beno yina ke kufwa, putulu ya ntoto, na lutumu. Beno me mona? Yinki ya kele? Yinki ke zola kutuba? Klisto. Nani kele Klisto? Ndinga. Théologie ve, kasi Ndinga!

¹⁵⁰ Na yina beno ke tuba, ti, “Bima yayi, oh, mu banza ya kele mbote samu na bakento na kulwata ba-pantalon.”

¹⁵¹ Ntangu, Ndinga me tuba, “Ve.” Beno me mona, Ya ke pesa beno kikesa na Yawu. Beno me mona? Ba me bendama na Yawu. Beno me mona, ya kele beno, kuna. Ya me kuma . . . Beno me kuma kitini ya Ndinga. Yawu nataka nzutu ya beno, ve . . .

¹⁵² Mbote, beno ke tuba, “Mbote, ntangu yayi, bika mu tuba na nge kima mosi. Pasteur ya munu . . .” Mu ke tala ve yina pasteur ya beno tubaka; yawu yina Ndinga ke tuba! Kana beno zola vwnda nsusu, beno kwenda na ntuala na yandi. Kasi kana pasteur ke tuba kuswaswana na Ndinga yayi, na yina yandi kele ve mudisi ya bangononi; uh-huh, yandi kele mudisi ya bansusu, beno me mona, ya bangononi ve. Beno me mona? Ngononi ke kudyaka na Madya ya bangononi. Beno me mona? Yawu ke kindisaka!

¹⁵³ Biblia ke tuba ti ya kele yimbi na kusala yawu, mpe babakala mpe nyonso yankaka mpe nyonso yina beno ke sala, ya kele yimbi. Beno ke tuba, “Bilumbu ya bimangu me lutaka.” Biblia yayi ke tuba ti Yandi kele mutindu mosi mazono, bubu yayi, mpe kukonda nsuka. Kana bawu tuba, “Yina kele mabanza ya bantu. Mpe ya kele mutindu ya kutanga mabanza, na kuswasikisa mabanza yayi. Mpe ba-vision yayi nionso mpe bima yankaka, kele buzoba,” beno me mona, bawu kele bansusu. Bawu zaba ve yina kele Madia ya ngononi.

¹⁵⁴ Kasi, mpangi-bakala, ntangu beno ke kuwa kuboka yina, ya kele na Kima mosi na kati ya beno! Beno kele ngononi, na kubanda. Samu na yinki? Beno kele Nkuna yina, yina me monana na mvumbukulu ya M-w-a-n-a, mpe na Mbuma yina ba me ningisa na zulu ya ntoto, samu na kuzabisa beno ti beno kele ngononi kasi nsusu ya denomination ve. Beno me mona yawu? Ah!

¹⁵⁵ “Kana Mpeve yina vumbulaka Yandi na lufwa,” Ndinga, Dynamique ya Ndinga, “ke zinga na kati ya beno, Yawu ke pesa diaka luzingu na nzutu ya beno yina ke kufwa.” Ntangu yayi wapi mutindu beto kele nsuni ya nsuni ya Yandi mpe mukwa ya mukwa ya Yandi? Samu, na nswalu nionso, ntangu beto kele diaka bansumuki, bantu yina ke kufwa, ya kukubama na kufwa, na banzutu yayi, Ya me kindisa nzutu yayi. Yinki kele *kukindisa?* “Kunata Luzingu.” Mpeve yina vwandaka zola kunwa, kubasika kuna, kusala pité, mpe bima yayi nionso, ya me kuzwa nkindusulu; na yina, kima yina me kufwa, mpe beno me vumbuka na lufwa. Ya ke kindisa nzutu ya beno yina ke kufwa.

¹⁵⁶ Na yina, banzutu ya beno kele tempelo ya Dynamique, samu (samu na yinki?) kubanda na mbandukulu beno kele kitini ya Mekaniki. Oh! Yawu yina mvumbukulu ya beno. Ya kele na Dibuuundu na kati ya mvumbukulu, na Yandi. Banzutu yayi me kuzwa nkindusulu kaka na ntangu yayi. Beno me mona, beno kuwaka; beno ke kwikila. Yawu sobaka beno na denomination samu na Ndinga. Beno me mona?

¹⁵⁷ Dynamique, kana ba me tula Yawu na zulu ya masa, ya ke kanga bamasini; “Bilumbu ya bimangu me lutaka.” Pum-pum-pum, “Oh, mu ke kwikilaka Biblia,” pum-pum-pum, “kasi ya kele ve—ya kele ve. . .” Pum-pum-pum! Beno me mona?

¹⁵⁸ Kasi ntangu Yandi ke bula funda mosi ya octane yina, “Vruuum,” yawu yina me kwenda, beno me mona. Oh, la la, ntangu Dynamique me kulumuka na Yawu! Kasi kana Yawu me kulumuka na nsusu, ya ke sala mbote mosi ve. Kasi ntangu Yawu ke kulumuka na ngononi, yandi ke kwenda. Amen! Dynamique na Mekaniki! Beno me mona yina mu zola kutuba? Ya kele, kana yandi kele ngononi ya kieleka ntangu yayi, yandi ke “bakula.”

¹⁵⁹ Beno bika mu sungika mwa Masonuku awa samu na beno. Mu banza ti beto kele ve ya kuvukana na allo-allo, kasi beto kele kaka awa. Santu Jean 5:24, Yesu tubaka, “Yandi yina ke kuwa Ndinga ya Munu, mpe ke kwikila na Yandi yina fidisaka Munu, kele na Luzingu ya kukonda nsuka.” Ntangu yayi beno tala, kana mu ke kwenda na bala-bala mpe mu ke baka kaka mpova yina, yina Yawu kele, kukondwa lubakusu ya kimpeve. . . Kukondwa kusala ti Yawu kutuba kima yankaka, kasi kaka yina Yawu ke tuba, beno me mona, mpova ya kieleka kuna, na Grec, na kieleka, ya ke tuba, “Yandi yina ke bakula Ndinga ya Munu.”

¹⁶⁰ Ntangu yayi, samu na kusiamisa ti ya kele kieleka. Mu ke kwenda kuna, mpe tala bakala yina me lawuka malafu ke kwisa kuna na bala-bala, mpe yandi me simba kento ya bakala yankaka na maboko ya yandi, mpe yandi ke zenga ndefi, yandi ke baka Nkumbu ya Nzambi na mpamba, mpe bima nionso ya mutindu yina. “Eh, nge me kuwa yina mulongi yina me tuba? Nge me kuwa yawu?” “Yinga, mu me kuwa Yawu!” Yina zola kutuba ve ti yandi kele na Luzingu ya Kukonda nsuka. Beno me mona? Beno me mona?

“Yandi yina ke bakula Ndinga ya Munu,” yandi yina kele ngononi!

¹⁶¹ “Ntangu yayi, Mpangi Branham, mu zola Masonuku ya kulutula na yina.”

¹⁶² Mbote mingi, “Mameme ya Munu ke kuwa Ndinga ya Munu. Bawu ke landa ve nzenza.”

¹⁶³ Mutindu na dyambu ya *Makwela Mpe Kufwa Makwela*, kilumbu yina. Ntangu Mpeve-Santu me tuba na munu mutindu yina, mu ke kwisa kutuba yawu kaka mutindu Yandi tubaka na munu.

164 Mama mosi ya longi kwangaka munu mbote-mbote fioti, samu na yawu. Yandi tubaka, “Mu banza ti nge ke baka kisika ya Nzambi?”

Mu tubaka, “Ve, mama.”

165 Yandi tubaka, “Mbote, nge tubaka na bawu ti ba me lemvočila masumu ya bawu.” Yandi tubaka, “Wapi kisika?” Yandi tubaka, “Nzambi kele kaka na kiyeka yina.” Beno me mona, Pharisien yankaka. Beno me mona? . . . ? . . .

166 Mu tubaka, “Nge me mona, samu ti nge zaba, ti, Yesu tubaka na Pierre mpe bantumwa, na manima yandi kuzwaka luzayikisu ya Nani Yandi vwandaka.”

Yandi tubaka na Yandi, “Nge kele Klisto, Mwana ya Nzambi.”

167 Yandi tubaka, “Nge kele ya kusakumuka,” beno me mona, “mwana ya Jonas; nsuni mpe menga ve me monikisa Yayi na nge, kasi Tata ya Munu yina kele na Mazulu me monikisa Yawu. Na zulu ya ditadi yayi mu ke tunga Dibuuundu ya Munu; myelo ya difelo lenda ve kununga Yawu. Mpe mu ke pesa na nge bafungula; nionso yina nge ke kanga na ntoto, mu ke kanga yawu na Mazulu; yina nge ke zibula na ntoto . . .”

168 Yina kele luzayikisu ya Kinzambi ya Ndinga yina me kuma nsuni. Kana Yawu vwandaka nsuni na kilumbu yina na nzila ya Mwana, Bakala ya makwela, Yawu kele nzutu bubu yayi na nzila ya Kento ya makwela. Beno me mona? “Bayina nionso beno ke lemvočila masumu ya bawu, ba ke lemvočila bawu; bayina nionso beno ke kanga masumu ya bawu, ba ke kanga bawu masumu ya bawu.”

169 Ntangu yayi, dibuuundu ya Katolika me baka yawu mpe me pesa yawu na banganga-Nzambi ya bawu, kasi yina kele kinsuni.

170 Beno tala mbote, ya vwandaka Ndinga ba me monikisa na kimpeve, yina salaka yawu!

171 Ya kele samu na yina Yandi tubaka na bawu na kukwenda botika na “Nkumbu” ya Tata, Mwana, Mpeve-Santu. Yandi zabaka ti bawu zabaka Nani Yandi vwandaka.

172 Mu vwandaka solula na longi mosi ya leke kilumbu yina, yandi tubaka na munu, yandi tubaka, “Ntangu yayi, Mpangi Branham, mu me kwenda vukana, mu me kwenda na dibuuundu *yayi*, dibuuundu ya Pentecote.”

173 Mpe, ba-Pentecotiste ntangu yayi me banda na kubaka ukaristiya ya ronde, beno zaba. Beno me kuwaka yawu, mu banza; dimpa kascher, nzambi-ngonda, beno zaba. Mpe bawu nionso ke ndimaka yawu mpe ba ke bakaka yawu. Bakala yayi tubaka . . . Dibuuundu ya yandi—ya yandi kwendaka na yandi; yandi tubaka, “Yina mu me sakumuna kele ya kusakumuna.” Ntangu yayi, ya kele ve yina nganga-Nzambi me tuba, yandi

“kele na ngolo ya kusoba yawu nzutu ya Klisto”? Beno me mona, ya kele kaka kima mosi, ya kele kaka kima ya mutindu mosi.

174 Mpe yandi tubaka, “Mu zola kuyufula nge kima mosi.” Yandi vwandaka meka na kutina diambu ya mbotika na Nkumbu ya Yesu, samu yayi vwandaka muntu yina tubaka ti ya vwandaka—ya vwandaka mbeni ya Klisto yina salaka yawu. Yandi tubaka, “Nge banza ti nionso yina kele mfunu ti muntu mosi kubaka mbotika na Nkumbu ya Yesu Klisto?”

Mu tubaka, “Yinga, tata.”

175 Yandi tubaka, “Na manima ba botikaka yandi na nkumbu ya ‘Tata, Mwana, mpe Mpeve-Santu?’”

176 Mu tubaka, “Yinga, tata. Yandi bakaka mbotika ve, na mutindu nionso. Beno me mona? Yandi me botama ve, ata fioti; na Nkumbu mosi ve. Yina kele kisalu.” Mu tubaka, “Ya me ndimama ve.” Mu tubaka, “Samu na yinki—samu na yinki Pierre. . .”

177 Yandi tubaka, “Mbote, ntangu yayi, bika mu tuba na nge kima mosi.” Yandi tubaka, “Ntangu yayi, na Actes 10:49, yandi tubaka, ‘Ntangu Pierre vwandaka tuba bampova yayi, Mpeve-Santu kulumukaka na zulu ya bawu.’”

178 “Kasi,” mu tubaka, “yandi balukaka mpe tubaka, ‘Muntu mosi lenda pekisa maza ti bayayi kuzwa mbotika ve?’”

179 Yandi tubaka, “Mbote, nge vwandaka tuba kuna, ntama mingi ve, samu na yina me tala Actes 19, kisika Paul kulutaka na basimu ya zulu ya Éphèse, talaka bilandi yina.” Mpe yandi tubaka, “Kasi,” yandi tubaka, “bawu botamaka ve na nkumbu ya Tata, Mwana, mpe Mpeve-Santu.”

180 Mu tubaka, “Ve, bawu botamaka ‘na kubalulaka ntima,’ ve samu na lemvo ya masumu. ‘Samu na kunata na kubalula ntima,’ samu Yesu vwandaka me zabana ntete ve. Munkayulu vwandaka me kufwa ve.”

Yandi tubaka, “Mbote, samu na yinki ba ke baka mbotika?”

181 Mu tubaka, “Muntu yina vwandaka na bafungula, yandi tubaka mutindu yayi, ‘Samu ti ya zabana na beno ti ya kele ve na Nkumbu yankaka na yisi ya Mazulu yina pesamaka na bantu, na nzila ya yina beno ke kuzwa mpulusu.’”

182 Mpulusu ke kwendaka kaka na Nkumbu ya Yesu Klisto. “Nionso yina beno ke zonga to ke sala, beno sala yawu nyonso na Nkumbu ya Yesu Klisto.” Ya kele ve na nkumbu yankaka, dibuundu mosi ve, luyalu mosi ve, bisalu ve, to kima yankaka ve! Kasi, Yandi kele Rose ya Saron, Lis ya Vallée, Mbwetete ya Suka, Alpha, Omega, Mbandukulu mpe Nsuka, Yehowa-yile, -rapha, -manassé, nionso yayi. Yandi kele bima nionso yayi, kasi Yandi. . . Ya kele ve na mpulusu na kati ya bisalu yina; *Yehowa*, ata mpulusu ve; *Rose ya Saron*, kasi Yandi kele, ata mpulusu ve; *Tata, Mwana*, to *Mpeve-Santu*, ata mpulusu ve.

Kaka na Nkumbu ya “Yesu Klisto!” Mpe kuna Biblia ke tuba, ti, “Kubalula ntima mpe lemvo ya disumu fwana longama na Nkumbu na Yandi, na mbandukulu na Jérusalem, mpe tii na nsuka ya ntoto.”

Yandi tubaka, “Nge banza ti ya ke sala luswaswanu?”

¹⁸³ Mu tubaka, “Tata, mu zola kuyufula nge kima mosi.” Yandi na munu, mpe kento ya munu, vwandaka ya kuvwanda na mesa. Yandi kwendaka kuna. Monaka munu, kwendaka. . . Mu tubaka, “Beto zole kele bantu ya Arizona; beto ke zingaka awa. Mpe Munu, mpe beto zaba conseil ya beto, mpe kizunga ya beto, mpe nionso, mpe mfumu ya mbanza ya beto, muyadi ya beto, mpe nionso.”

Yandi tubaka, “Yinga.”

¹⁸⁴ Mu tubaka, “Ntangu yayi, kana mu me tuba na nge, mpangi-bakala, na, ‘Kwenda awa mpe kusiné samu na madya ya beto ya midi, na nkumbu ya Muyadi ya Kizunga ya Arizona,’ nge ke kwenda kusiné yawu mutindu yina? Beno banza ti ba ke ndima yawu na caisse?”

¹⁸⁵ “Samu na yinki,” yandi tubaka, “Mu banza ve.” Yandi tubaka, “Samu na yinki Yesu tubaka mutindu yina?”

¹⁸⁶ Mu tubaka, “Yawu yina kieleka, beno me mona. Samu na yinki? Kana mu me tuba na beno ‘kwenda siné samu na madia ya midi yayi, na nkumbu ya Muyadi ya Kizunga ya Arizona,’ mpe mutindu beto kele bisi-ntoto ya Arizona, mpe beto me zaba nani Muyadi kele, na yina, beno ke zaba kusiné yawu na nkumbu ya ‘Sam Goddard,’ beno me mona.” Mu tubaka, “Samu, yandi kele Muyadi ya kizunga. Mu fwana ve kuyufula beno. Beno zaba nani Muyadi kele. Mpe, ntangu Yandi tubaka, ‘Tata, Mwana, mpe Mpeve-Santu,’ Yandi zabaka wapi mutindu bawu ke kwenda botika. Ba zabaka Nani Yandi vwandaka. ‘Mameme ya Munu ke kuwaka Ndinga na Munu.’ Beno me mona? Beno me mona?”

Yandi tubaka, “Oh, mu me mona.”

¹⁸⁷ Kasi ntangu yayi, kima ya kulanda, beno ke kwikila? Beno me mona? “Yandi yina ke kuwa Ndinga ya Munu, mpe ke kwikila na Yandi yina fidisaka Munu, kele na Luzingu ya kukonda nsuka.” Mpe ntangu Luzingu yayi ya malu-malu ya Kukonda nsuka ke zinga na kati ya beno, Yawu kele ngolo.

¹⁸⁸ Ntangu beno me kuzwa Mpeve-Santu yayi, yina bawu salaka na Pantekote; bawu vwandaka mekaniki, ntangu yayi Dynamique fwana kukwisa. Bawu kwikilaka. Beno zaba, bankundi ya beto ya ba-Baptiste ke tubaka na beto, “Ntangu beto ke kwikila, beto me kuzwa Yawu.” Kasi, bawu vwandaka na Yawu ve, kasi bawu vwandaka kwikila.

¹⁸⁹ Actes 19, bawu kwikilaka, kasi bawu vwandaka na Yawu ve. “Beno kuzwaka Mpeve-Santu ntangu beno kwikilaka?” Beno me mona? Ba vwandaka na Bisadi-bisengo, mbote mingi, samu

bantumwa vwandaka . . . Kasi, mu zola tuba, Apollos vwandaka longa na bawu mpe talisaka na nzila ya Biblia, Mekaniki, ti Yesu vwandaka Klisto, kasi ba vwandaka ntete ve na Ngolo. Beno me mona? Yawu yina. Mbote mingi.

¹⁹⁰ [Kisika ya mpamba na bande—Mu.] . . . -kaniki, beno kele na lufutu na kieleka nionso, bayina ke vingila.

¹⁹¹ Ntangu yayi, ntangu beno me kuzwa Dynamique, beno me kindisama na kufwa na kukondwa kufwa. Ya ke sala ti nzutu ya muvimba kutumama na Ndinga. Ya ke sala ti beno sala mambu ya kuswaswana, beno tala ya kuswaswana, beno zinga ya kuswaswana. Ya ke sala beno kaka ya kuswaswana.

¹⁹² Beno tala ntangu yayi . . . [Kisika ya mpamba na bande—Mu.] . . . ba kindisaka bawu. “Beni yina vwandaka ntete ya kufwa na masumu mpe yimbi, mpe mudidi, me vutula Yandi na luzingu.” Na nzila ya yinki? “Mpeve ya Yandi yina vumbulaka Yesu,” na suka ya Paki, “na lufwa. Mpe kana Yawu ke zinga na banzutu ya beno yina ke kufwa,” ntangu yayi beno tala mbote, “Ya ke kindisa diaka, ke nata Luzingu, ya ke sala ti yawu tumama na Ndinga.”

¹⁹³ Ntangu yayi, wapi mutindu beno lenda tuba ti beno kele na Mpeve yina, mpe kumanga Ndinga? Beno me kindisama na kima yankaka. Na yina, Ya ke kindisa banzutu ya beno yina ke kufwa na Ndinga. Ya kieleka, Ya ke sala yawu.

¹⁹⁴ Beno lendaka ve kukwenda na ntwala kukondwa Yawu. Beno ke kanga kaka bamasini, kana beno me kwikila Yawu nionso ve. Kana beno kele na ndambu ya essence mpe ndambu ya masa, beno ke kwenda kisika mosi ve. Beno me mona? Beno fwana baka essence, nkama na zulu ya nkama. Kana beno me sala yawu ve, beno ke kuzwa kima mosi ve, mpe beno kele ve na ngolo. Beno me mona? “Kasi mu—mu ke kwikilaka *yayi*, kasi mu ke kwikilaka ve *Yina*,” pum-pum-pum-pum. Beno ke kwenda kisika mosi ve.

¹⁹⁵ Kasi, oh, ntangu beno me baka nionso ya muvimba! Bika yawu pela na zulu kuna, Ndinga nionso kele Kieleka!

¹⁹⁶ Na yina beno tala ntangu yayi, na yina beto ke sukisa, beno simba yayi. Beno tala, ya kele kaka mutindu mwa nkuna ya fyoti na kati ya ntoto.

¹⁹⁷ Ntangu yayi, na kieleka nionso, beno me vumbuka na lufwa. Beno me vumbuka na lufwa ntangu beno me kuzwa Mpeve-Santu na kati ya beno. Beno me vumbuka na lufwa na ntangu yina. Nzutu ya beno kieleka me vumbuka na lufwa.

¹⁹⁸ Beno tala mbuma ya fioti. Kuna yawu na kati ya ntoto. Ya fwana kunwa na yinto ya Yandi, bamasina yina ke kulumuka. Mpe mutindu yawu ke kunwa, ya ke mata pene-pene ya Yandi, na kufwananaka na nkuna yina kulumukaka na ntoto. Beno me mona?

199 Dibuundu me kuma mutindu yina, na nzila ya kunungisama, kusantisama, mbotika ya Mpeve-Santu, ntangu yayi ya me zibuka. Beno me mona? Mpeve ya Nzambi ke luta na nzila ya yawu.

200 Mpe mpeve ya yinza me luta na mbeni ya Klisto, mutindu mosi, mpe ntangu yayi ya me zibuka na kuvukana ya nene ya mabuundu, beno me mona, kima ya muvimba.

201 Mpe muntu mosi ke kwisa mutindu yina. Bima nionso ke sala mutindu mosi, na kikalu mosi na Nzambi, samu Yandi kele mutindu mosi mazono, bubu yayi, mpe kukonda nsuka. Beno tala, beno kele na nzila, ke na kukulaka tii na muvimba ya mvumbukulu, ya kutwadisama na Mpeve!

202 Mutindu mwini, m-w-i-n-i, ke bendaka mwa kimenina yina ke kunwa na yinto ya Nzambi, yina ke landila kaka . . . Beno me mona, yawu lenda kunwa kaka na kima mosi. Beno mwangisa mafuta kuna na zulu ya mwa nkuna yina na ntangu mosi; beno ke kufwa yawu. Ya kieleka. Beno mwangisa masa yina ke ninganaka ve, masa ya ntama yina kele mbote ve, yina kele na mikolobo, ya ke kanga kukula ya yawu. Ya ke buta mbuma ve. Ya kieleka? Kasi beno mwangisa masa ya mvula ya kitoko ya lembami, amen, ata ba-produit chimique yina me salama na bantu kuna na kati, beno bika yawu kulumuka kaka na mazulu, mpe beno tala mbote mwa yinti yina. Ya ke na masa ve yina ke sala ti yawu kukula mutindu masa yina ya mvula. Beno tula chlore mpe bima yayi na kati ya yawu, mutindu ba ke mekaka na kukotisa yawu na beto, mpe, kima ya ntete beno zaba, yawu ke kufwa kimenina.

203 Yawu yina diambu bubu yayi. Ba ke meka na kupesa bawu bamasa ya yinto ya ba-denomination, mpe ya ke kanga kukula ya yawu. Beno me mona? Kasi bika ba pesa yandi:

Beno kwiza kisika ke lezima kinoko ya kyadi;
Sema pene-pene ya munu na mwini mpe
mpimpa,
Yesu, Nsemo ya yinza.

Na yina beno me kuzwa yawu, kuna.

Beto ke tambula na Nsemo, Nsemo yina ya
kitoko mingi,
Beno kwiza kisika ke lezima kinoko ya kyadi;
Sema bisika nionso pene-pene ya munu!

204 Katula mwa biziba yayi ya bantu ntama na munu! “Mu zaba yinto yankaka ve, kaka Menga ya Yesu!” Yawu yina kaka Yinto mu zola zaba. Bika ti Ndinga kuzinga na kati ya munu, Mfumu; mwangisila Yawu masa na Mpeve ya Nge.

205 Beno tala, ntangu yayi, kana Mpeve yina vumbulaka Yesu na ntoni, ke zingaka na kati ya beno, beno kele kaka na Luzingu; me twadisama na Mpeve, samu na kukindisa Ndinga na beno, samu

na kukwikila Yawu. Mwa kima yina ya fioti ke mataka kaka na zulu mutindu ya ke na kukula.

²⁰⁶ Beno tala, na Pentecote, banzutu ya bawu kindisamaka na Luzingu ya malu-malu. Beno tala nkonga ya mwa bantu ya boma.

²⁰⁷ Mu me kanga beno ntangu ya yinda? [Dibuundu me tuba, “Ve.”—Mu.] Beno tala, ya me yangidika munu, yawu yina, mu me kuwa mbote. Oh, la la!

²⁰⁸ Beno tala, bawu vwandaka bantu ya boma. Beno tala. Kasi, bawu vwandaka na Mekaniki. Beno me mona? Kasi bawu nyonso vwandaka ya kuvwanda na manima kuna, ba vwandaka tuba, “Oh, mu kele na boma ya yawu. Oh, mu kele na boma ya kukwenda kuna mpe kundima yawu pwelele, samu, oh, bawu nionso kele ba-évêque ya nene mpe nionso yina kuna. Oh, mu kele na boma ya kukwenda kuna. Banganga-Nzambi yina mpe nionso yina, mu kele na boma ya kundima yawu pwelele, mu kele na boma ya kutuba ti mu me kwikila na Yandi. Oh, mu lenda kaka ve kusala yawu, nge me mona.”

²⁰⁹ Kasi, na mbala mosi, Dynamique kwisaka. Yinga. Mpe yinki Yawu salaka? Yawu fulusaka ve kaka mpeve ya bawu, kuna na kati, kasi Yawu kindisaka mekaniki ya bawu. Banzutu ya bawu kindisamaka. Ba vwandaka na boma ve. Ba basikaka kuna na ntuala ya bantu. Yinga, tata. “Beno bantu ya Judée, mpe beno yina ke zingaka na Jérusalem!” Na yina, ntete Dynamique kukwisa, ba vwandaka kaka na mekaniki. Beno me mona? “Beno bantu yina ke zingaka na Jérusalem, bika ti beno zaba mutindu yayi, mpe beno kuwa bandinga ya munu! Bayayi me kukola malafu ve, mutindu beno ke banza.”

²¹⁰ Mu kele mosi ya bawu. Yawu *Yayi!* Mu ke lakisa beno yinki ya kele. Ya kele Masonuku. *Yayi* kele Yawu! Mpe mu ke tubaka ntangu nionso, “Kana *yayi* kele ve Yina, bika mu bumba *yayi* tii kuna Yina ke kwisa.”

²¹¹ “Ve, yayi kele Yina zonzaka profete Joël, ‘mpe ya ke salama ti na bilumbu ya nsuka, tubaka Nzambi, Mu ke mwangisa Mpeve ya Munu na zulu ya bantu nionso.’” Beno me mona, Dynamique me kota na mekaniki. Ba vwandaka diaka ve na boma.

²¹² Bayankaka na kati ya beno bantu yina kele na boma ti bakento yankaka ke seka beno samu beno kele na bansuki ya yinda, to beno me yambula maquillage; bayankaka na kati ya beno babakala yina kele na boma ti organisation ya beno ke losa beno na nganda ntangu beno ke botika dibuundu ya beno na mbotika ya Masonuku; beno kele na nsatu ya kukangama na kivinga ya zulu tii kuna Dynamique ke kwisa. Ya kieleka.

²¹³ Ya sobaka bawu. Ya kindisaka bawu. Ya salaka bawu ya kuswaswana. Ba vwandaka bantu ya kusoba, kubanda ntangu yina. Yawu kindisaka bawu, na luzingu ya ntama ya kuvwanda muntu ya boma, samu na kukuma mutindu Nkosi ya dikanda ya

Yuda. Bawu kutanaka kieleka na kimbangi, ba komaka bawu na bakulunsi, ba komaka bawu yintu na ntoto, ba yokaka bawu, ba losaka bawu na dibulu ya bankosi. Ya vwandaka diaka na boma, na kati ya bawu. Lufwa vwandaka lunungu ve na zulu ya bawu, ata fioti. Dynamique vwandaka na kati ya mekaniki. Yinga, tata. Yawu kindisaka nzutu ya bawu ya lufwa.

²¹⁴ Ntangu yayi beno kuwa. Yawu yayi kima yankaka, samu na kidimbu. Yawu kindisaka bawu mingi na mutindu ti (Beno zaba yinki?) ba zangukaka na bisika ya Mazulu, mpe banzutu ya bawu ya lufwa kindisamaka ti mutindu ya bawu ya bawu ya kutuba sobaka. Ya vwandaka kaka. . . Yawu kindisaka mutindu ya bawu ya kutuba. Yawu yina Biblia me tuba. Mpe, banzutu ya bawu ya lufwa kindisamaka, mutindu ya bawu ya kutuba kindisamaka. Mabanza ya bawu kindisamaka. Bampeve ya bawu kindisamaka. Luzingu ya bawu kindisamaka. Bawu kindisamaka, ya muvimba! Bawu mekaka na kuzonza, mpe lendaka dyaka ve kutuba bandinga ya kimuntu. Bawu kindisamaka na Ntwala ya Nzambi tii kuna bawu zonzaka bandinga ya malu-malu, ndinga ya Mazulu. Fiou! Wapi Ngolo yayi na nkindusulu!

²¹⁵ “Kana Mpeve yina vumbulaka Yesu na lufwa ke zinga na kati ya beno,” oh, alleluia, “Ya ke kindisa nzutu ya beno ya lufwa.” Ya ke sala ti beno kusala bima yina beno vwandaka sala ntete ve. Bawu vwandaka ya kufulukuka na Ngolo ya nkindusulu na ntangu yina. Beno me mona?

²¹⁶ Nzutu ya beno kele diaka ve ya kukangama na disumu; beno, bansatu ya beno.

Yandi ke tuba, “Kwisa awa!”

Beno ke tuba, “Kanga yinwa ya nge.”

“Oh, beto kele na yina ya kulutila nene. . .”

“Kanga yinwa ya nge.” Oh, nge kele ngononi!

²¹⁷ Beno me monaka ntete mutindu ngononi ya kiboba ke tambulaka na kimpwanza? Yandi ke dumukaka ve mutindu ngoy-ngoy, beno me mona, na yina nionso kele ya kufwa, mpe na bima nionso ya kubola yina kele kuna na ntoto. Ve, tata. Yandi ke tambulaka na lulendo.

“Kanga yinwa ya nge.”

“Oh, awa kele na madia ya mbote awa.”

²¹⁸ “Ve samu na munu. Beno me mona, bansatu ya munu me sobaka. Bansatu ya munu kele ya kuswaswana. ‘Samu muntu ke zingaka ve kaka samu na madia ya kubola, kasi na konso Ndinga yina me basika na yinwa ya Nzambi.’” Ngononi ya kieleka yina me kindisama ke zingaka na nzila ya Yawu. Amen!

²¹⁹ Oh, mpe Yandi vumbulaka Klisto na ntoni, na kuzingaka na kati ya beno, me kindisa nzutu ya beno ya kufwa na Mvwandulu

ya Yandi. Beno ke ndima Yawu. Beno kele diaka ve yina ke kudiaka madia ya kubola. Beno kele ngononi. Beno ke zola ve bima ya yinza. Beno kele mwana-bakala mpe mwana-kento ya Nzambi. Beno kele na mukembu na Yinto yina yinza me zaba ve. Beno ke na kunwaka Yawu. Muntu mosi zaba . . . Yinza zaba kima ve samu na yawu. Beno ke na kudia Mana yina yinza me zaba ata fioti ve kima mosi samu na Yawu, samu beno kele ngononi. Ba me kindisa beno na mazulu kisika beno lendaka kuma na Yawu. Beno lendaka ve kukuma na Yawu na nsi *awa*, beno fwana kukuma na yawu na zulu *awa*. Beno fwana kukindisama, kuzanguka tii na zulu awa, samu Yawu kukindisa.

²²⁰ Yinki bawu salaka? Bawu zonzaka na ndinga yankaka. Biblia me tuba ti bawu salaka yawu. “Bawu zonzaka na bandinga nyonso kele na yisi ya Mazulu.”

²²¹ Beno lenda banza yawu, banzutu ya ntama ya lufwa yina vwandaka kuna, yina vwandaka tuba, “Mbote, mu zaba ve ntangu yayi kana mu lenda kwikila yayi to ve”?

²²² Na mbala mosi, ba vwandaka me kindisama tii ngolo ya Nkosi ya dikanda ya Yuda kulumukaka na kati ya bawu, na zulu ya Mbuma yina ba me ningisa. Oh, Ngononi yina kwisaka samu na kubokila bantu ya Yandi! “Mpe bawu zolaka ve baluzingu ya bawu samu na boma ya lufwa.” Amen.

Mpe ya ke vwanda na mingi yina ke pesa
menga ya luzingu ya bawu
Samu na Nsangu ya mbote yayi ya Mpeve-
Santu mpe kutiamuka ya Yawu ya mbwaki.

²²³ Mpe Mwana fwana—fwana monisama diaka, na kati ya Kento ya makwela na kilumbu ya nsuka; Ngolo ya nkindusulu fwana kwisa, samu na kukindisa bawu ti bawu kuluta badenomination yayi ya lufwa mpe ba credo, na Ndinga ya moyo ya Nzambi ya moyo. Oh!

²²⁴ Ve, Yawu me kindisama na Luzingu ya malu-malu. Yawu ke sala kima mutindu mosi samu na beto ntangu yayi. Beno tala, na yina, ba vwandaka me kindisama mingi na kati ya Ngolo yina ya nkindusulu! Ntangu yayi munu . . .

Beno kuwa mbote ntangu yayi. Mu ke na kumeka na kulakisa beno.

²²⁵ Ngolo vwandaka kaka ve na kati ya moyo ya bawu, kasi Yawu vwandaka bisika nionso. Yawu . . . Dynamique kotaka ve kaka na kati, samu na kukindisa, kasi Yawu kindisaka mekaniki. Beno me mona yina mu zola kutuba? Bawu kindisamaka mingi ti baludimi ya bawu bandaka na kutuba na ndinga yankaka. Bawu bakaka luzingu na nzila ya Ngolo ya mvumbukulu ya Klisto, ti bawu tentikaka maboko ya bawu . . . Bawu kindisamaka mingi na Ngolo ya nkindusulu, ti, ntangu ba tentikaka maboko ya bawu na zulu ya bambevo, bawu belukaka. “Yawu kindisaka

nzutu ya bawu ya lufwa.” Bawu belukaka, na kutentikaka ya maboko ya bawu.

226 Mpe Mpeve kindisaka ngwisani ya bawu kintwadi na Nzambi, ti bawu kindisamaka diaka mingi na Mvwandulu ya Nzambi ti, ntangu muntu mosi kufwaka mpe moyo ya yandi vwandaka me kwenda, Yawu bokilaka yandi diaka na luzingu. Amen! Nkembo! Ntangu yayi mu ke kukitala musambidi.

227 Ya kieleka, ya me kindisama! Mvumbukulu ya Yandi vwandaka ve kaka samu na Yandi mosi, kasi samu na yina nionso me zola, samu na Nkuna yina me vwanda kuna. Ya ke kindisa, ke kindisa nzutu ya lufwa!

228 Bawu tentikaka maboko na zulu ya bambevo; bawu belukaka. Ba vwandaka sambila; na Kimpeve bawu monaka ba-vision, ba vwandaka tuba mpe bantu ya kufwa vwandaka vutuka na luzingu. Ya kieleka. “Yandi kindisaka nzutu ya bawu ya lufwa.”

229 Kana Yawu kota na kati ya beno; kana ya kele kieleka mutindu yina. . . Ntangu yayi, beno lenda tuba ti yawu ke mutindu yina; kasi kana yawu kele mutindu yina, bidimbu yayi ke landa yawu, beno me mona. “ya ke kindisa nzutu ya beno ya lufwa.” Ya ke kindisa beno.

230 Ntangu yayi, beno tala, yawu ke kindisa beno na Mvwandulu ya Nzambi. Samu na yinki? Ya vwandaka Mpeve ya Nzambi yina vumbulaka Yesu na ntoni. Mpe, Mpeve ya Nzambi, “Mu ke pesa bawu Luzingu ya Kukonda nsuka,” me katuka na mpova ya Grec, kana beno sosa yawu, ya kele Zoe, Yandi ke sala Yawu na kati ya beno mpe na yina Ya ke kindisa (ya bawu) mpe mabanza ya bawu.

231 Ntangu yayi beno tala. Wapi mutindu beno lenda tuba ti Mpeve yina ke zingaka na kati ya beno? Ata ti beno me sala nyonso yina beno banzaka vwandaka ya kulunga, yayi kele nzikisa yina ke talisa kana beno ke kwikila Yawu to ve. Kana Mpeve yina vwandaka na kati ya Klisto kele na kati ya beno, Yawu ke kindisa beno diaka na Ndinga, samu Yandi kele Ndinga. Mpe kana, ya kuswaswana, ya ke kindisa beno samu na kunata beno ntama na Ndinga, na yina ya kele Mpeve ya klisto! . . . kipeve yina beno me sala, tii kuna Ya ke nata beno na kati ya Ndinga. “Mameme ya Munu ke kuwaka Ndinga na Munu, mpe bawu ke zingaka na Ndinga nionso,” Ndinga nionso! Mu vwandaka tubila yawu kilumbu yina.

232 Mama ya munu mosi, yandi me kufwa ntangu yayi, mpe yandi vwandaka kento mosi ya ngitukulu. Mpe yandi vwandaka, beno zaba, ndambu Indienne, mpe yandi vwandaka ya ngitukulu. Kasi ya vwandaka muntu yina vwandaka lota ve. Kasi mu banza ve. . . Yandi kuzwaka kaka bandosi yiya to tanu, luzingu ya yandi nionso. Kasi ntangu nionso yandi vwandaka

lota ndosi mosi, ya vwandaka ya kieleka. Yandi kuzwaka ndosi mosi, ya vwandaka ya kieleka.

²³³ Mu ke bambuka moyo kilumbu mosi ntangu mu bandaka na kulonga, bamvula mingi me luta. Beto vwanda zinga kaka awa na nzila, kaka na zulu awa. Mu vwandaka longwa awa na yinzo-Nzambi yayi. Mpe yandi lotaka ndosi mosi, ti mu vwandaka ya kutelama awa pene-pene ya ba-bimatinu tatu. Mpe mu vwandaka ya kutelama, mu vwandaka longwa na bantu nionso, ti bawu fwana kumata bimatinu tatu na ntwala bawu kukuma na bala-bala. Mpe na bala-bala yango ya vwandaka na mwa nzila mosi ya mpembe ya musanga, yina vwandaka kwenda mbala mosi tii na bielo ya Mazulu, tii na mwelo ya musanga. Mpe musanga yina vwandaka ya kubenda tii na zulu ya bimatinu yayi. Kana yina kele ve kieleka Nsangu ya munu bubu yayi; kunungisama, kusantisama, mbotika ya Mpeve-Santu! Mpe mu vwandaka tuba ti muntu fwana tambula na bimatinu yayi tatu, samu na kuvwanda na kiyeka ya kutambula na bala-bala yayi. Mpe mu tubaka ti . . .

²³⁴ Mama mosi kwisaka. Ntangu yayi, beno zaba mutindu ya basapatu yayi bantu vwandaka lwata bamvula makumi tatu na tanu me luta. Mama mosi kwisaka, yandi vwandaka me lwata basapatu ya nene mutindu ba ke lwataka bubu yayi, basapatu ya talon ya sindani. Mpe yandi lutaka. Mpe mu tubaka, “Vingila fioti, mpangi-kento. Nge lenda tambula ve na bala-bala yina.” Mpe mu tubaka, “Nge—nge, nge lenda sala yawu ve.”

²³⁵ Mpe yandi tubaka, “Ah!” Yandi tubaka, yandi balukaka na bakento yankaka, yandi tubaka, “Beno kwikila yandi ve. Yandi kele kilawu. Beno me mona? Beno kwikila yandi ve. Mu ke lakisa beno ti mu lendaka kunungisama, kusantisama, mpe ya kifuluka na Mpeve-Santu, mpe kulandila kaka na kutambula yina.” Mpe yandi . . . Mu bikaka kaka yandi kukwenda. Mu lendaka diaka ve kusala kima mosi samu na yawu, mu lendaka ve kusutope yandi. Mpe yandi dumukaka na bala-bala. Mpe yandi balukaka samu na kutala mpangi ya kento, yandi tubaka, “Nge me mona, mu tubaka na nge!” Yandi bandaka na kukwenda mbangu na bala-bala, mpe yandi . . .

²³⁶ Beno zaba, mutindu Biblia ke tuba, na kapu ya Esaie, 5, ti ba ke “na bankingu ya ngolo.” Ba ke sala yawu; ya kele ya kubaluka na manima, beno me mona. “Ba ke denda . . .” Ba fwana sala yawu, bawu fwana kudenda, “Ba ke denda ntangu ba ke tambula, na kusalaka makelele na ba-talon ya bawu; beno me mona, bana-bakento ya Sion na kilumbu ya nsuka.”

²³⁷ Mpe yandi bandaka na kumata na bala-bala yina, na nswalu nionso. Mpe, na manima ya mwa ntangu fioti, bala-bala yango kumaka fioti mingi mpe fioti mingi. Yandi bandaka na kutenga-tenga, na kudenda mutindu *yayi*, mpe yandi basikaka na nzila.

238 Mpe mama tubaka, “Bakuboka ya kulutila boma yina mu me kuwaka ntete ve na luzingu ya munu, vwandaka ya kento yina vwandaka kubwa na kati ya batiya yina mpe mulinga yina, mutindu yandi vwandaka kulumuka, mpe vwandaka kulumuka mutindu yina.” Yandi tubaka, mu “balukaka mpe tubaka, ‘Nge me mona?’”

239 Yandi tumamaka kaka na nionso kasi kaka na Ndinga mosi ve, beno me mona, bima nionso kasi kaka na Ndinga mosi. Kieleka, bakento ya Pantekote lenda vwanda na mpulusu, ya kusantisama, mpe ya kufuluka na Mpeve-Santu, mpe kasi kubwa. Ya kieleka. “Muntu ke zinga kaka na dimpa ve, kasi na konso Ndinga yina me kuzingila yawu.” Beno me mona? Beno me mona? Mpe yandi bwaka na Yawu. Mpe mutindu mu tubaka, beno me mona, yandi zolaka kota, mbote mingi, kasi, beno me mona, yandi kondwaka na kuwa; mu tubaka na yandi yina vwandaka na ntuala. Mpe Yandi me sonika Nsangu ya mbote na nzila ya bilandi, bantumwa, mpe Malongi ya bantumwa mpe baprofete, mpe nionso yina, mpe bawu ke kuwa yawu ve.

240 Ntangu yayi beno tala Ngolo yayi ya nkindusulu, *Zoe*, yina ke nata Ndinga, dibanza yina vwandaka kati na Klisto kuvwanda na kati ya beno na ntangu yina. Mu ke na kumeka kutalisa beno, ti, beno, ntangu beno me vumbuka. Ntangu Nzambi vumbulaka Yesu na lufwa, Yandi vumbulaka beno, diaka. Mpe ba me kindisa beno diaka na Luzingu, na Yandi, beno me kindisama ntangu yayi na Luzingu, ata ti beno vwandaka na ntangu yina kinama na kati ya mabanza ya Yandi, kasi Nzambi monaka bayina nionso ke vwanda na kati ya Yandi, na nsuka, beno me mona. Ntangu Nzambi kulumusaka meso na nzutu . . .

241 Mpeve bikaka Yandi, na Disamba ya Gethsémané. Yandi zolaka kufwa, muntu. Beno bambuka moyo, bankundi, Yandi zolaka sala yawu ve. Ya vwandaka Nzambi. Nzambi pakulaka nzutu yina, yina vwandaka nsuni ya muntu. Mpe Yandi lendaka ve . . . Kana Yandi kwendaka kuna, mutindu Nzambi, ata mbala mosi ve ti Yandi zolaka ata fioti ve kufwa lufwa ya mutindu yina; ba lendaka ve kufwa Nzambi. Kasi Yandi lendaka ve kusala yawu.

242 Kasi, beno bambuka moyo, Yandi kwendaka kuna na beno na kati ya Yandi. Beno me mona, ata mbala mosi ve Nzambi kabulaka Kento ya makwela na Bakala ya makwela, na ntangu yina. Na yawu ntangu Nzambi kulumusaka meso na nzutu ya Klisto, Yandi monaka bakala mpe kento. Yawu nionso vwandaka me kuzwa mpulusu na nzutu yina mosi. Beno me mona? Bawu kele mosi, mutindu mosi, Ndinga mosi. Ndinga mosi, yina tubaka samu na Bakala ya makwela, ke na kutuba samu na kento ya makwela.

243 Mbote, wapi mutindu Kento ya makwela lendaka vwanda kuna, mpe kukondwa kulakisa nyonso yina ba silaka samu na

Yandi; mpe Bakala ya makwela ke vwanda kuna, mpe Yandi ke vwanda ve Kento ya makwela? Kasi ntangu Yandi salaka nionso, ata ti samu na kutalisa yawu na manima, na kuvumbukaka Yandi na lufwa, na yina Kento ya makwela fwana sala kima mutindu mosi, ya kieleka yawu yina Ndinga tubaka ti Yandi ke vwanda na bilumbu yayi ya nsuka? Yandi ke vutuka ve na Malachie 4? Yandi fwana ve kutalisama mutindu ya vwandaka na bilumbu ya Sodome? Yinzo ke vwanda kaka ve mutindu ya kele? Bima yayi kele ve kutalisama ya kulunga ya Ndinga ya Nzambi yina me zabana na beto?

²⁴⁴ Mbote, bankundi, mu zaba ti mu ke baka beno ntangu ya yinda, minuti kumi na tanu me bikana na ntwala ngunga ya madia ya midi, kasi mu banza ti mu ke manisa na ntwala ya yawu. Kasi beno tala, beno tala awa, wapi kima ya kulunga ya kele. Mu zaba ve ntangu mu ke mona beno diaka. Beno me mona?

²⁴⁵ Beno tala, beno tala yayi. Kasi Nzambi monaka Kento ya makwela na kati ya Bakala ya makwela. Alleluia! Beno me mona, samu na kuvulusa Kento ya Yandi, mutindu Adam, Yandi zolaka kwenda na Yandi. Adam zabaka yina yandi vwandaka sala; Ève zabaka ve yina yandi vwandaka sala, kasi Adam basikaka samu na kuvwanda na kento ya yandi. Beno me mona? Mpe Yesu bakaka kisika ya Kento ya Yandi mpe kumaka disumu samu na Yandi. Beno bambuka moyo, Yandi kumaka beno, Yandi bakaka kitumbu ya beno, ti beno lendaka telema na kisika ya Yandi. Yandi telemaka na kisika ya beno, samu beno telema na kisika ya Yandi. Wapi mutindu ya luzolo! Wapi mutindu ya kubundana! Wapi mutindu beto lenda manga yawu? Wapi mutindu beto lenda sala kima yankaka kasi kuzola Yandi, nkundi? Mu lendaka bikala na zulu ya yawu bangunga mingi, kasi beto kwenda fioti na ntwala.

²⁴⁶ Mutindu nzingulu ya pentecote bubu yayi, mpe nkwizulu ya Mpeve-Santu na bilumbu yayi ya nsuka, mutindu ba silaka, ya kele mutindu mukanda ya muswa ya kima mosi ba lendaka telemina ve. Beno me mona?

²⁴⁷ Ntangu yayi, beno lenda kuzwa mukanda mosi. Kieleka. Beno me mona? Beno lenda vwanda na mukanda mosi na kisika mosi, kasi yina zola tuba kaka ve ya kele ya beno. Ve, tata. Muntu mosi ntama kuna lendaka kwisa kulomba yawu. Kasi ntangu beno kele na mukanda ya muswa yina ba lendaka telemina ve, yina ke talisa ti nionso yina zolaka telemina yawu ba me vwanza yawu, tii kuna na mbandukulu. Ya kieleka?

²⁴⁸ Mpe ntangu muntu mosi me tuba ti yandi ke kwikila Ndinga, mpe na manima ntangu Mpeve-Santu ke kwisa, Ya kele mukanda ya muswa yina ba lendaka telemina ve. Mpe yina ke pesa beno muswa, ntangu beno me kuzwa mukanda yina ba lendaka telemina ve, ti konso kitini ya yawu kele ya beno, mpe bima nionso kele na kati ya yawu kele ya beno. Amen! Mpe yina

ke pesa beto muswa, ntangu Mpeve-Santu ke kwiza na zulu ya mukanda yayi ya muswa yina Nzambi monaka ntama kuna na ntwala ya mbandukulu ya yinza, mpe tulaka nkumbu ya yawu na Buku ya Luzingu; kasi kubutukaka na nzila ya bakala mpe kento, mpe me kangama na disumu, mpe yandi me kubwa na disumu. Kasi ntangu mu me kwikila Yawu, mu me kuzwa mukanda ya muswa; kasi ntangu Mpeve-Santu me kwiza, Ya vwandaka mukanda ya muswa yina ba lendaka telemina ve ti bima nionso me telemina munu, ata ti mama ya munu salaka yawu, tata ya munu salaka yawu, nkooko ya munu ya kento salaka yawu. . .

²⁴⁹ Ya kele mutindu, mwana yina ya fioti ya kimbevo ya épilepsie yina mu sambilaka, na mwa ntangu fioti me luta, ya sambukilaka yandi na nzila ya bankooko ya yandi. Epilepsie sambukilaka yandi, mpe na zulu ya mwana yayi, mu me tuba.

²⁵⁰ Kasi ntangu mukanda ya muswa yina ba lendaka telemina ve kwisaka, Yandi vwanzaka, Yandi zimbisaka nionso. Mu kele na mukanda yina ba lendaka telemina ve na ntangu yina. Amen! Mpe mutindu kieleka Mpeve yina vumbulaka Klisto na lufwa, mu kele na muswa ya kutuba ti mu kele kitini ya Nzutu yango, na mukanda ya muswa yina ba lendaka telemina ve ya Mpeve-Santu yina ke sala ti nzutu yayi ya Ndinga kusala kaka mutindu Yawu salaka na kati ya Yandi, mutindu Yandi silaka na kilumbu ya nsuka. Mukanda ya muswa! Ba me vwanza masumu ya munu nionso, na nzila ya Menga ya Yesu Klisto, mpe Mpeve-Santu ke kwiza mutindu mukanda ya muswa ya kima yina Nzambi pesaka munu na nzila ya lemvo, na luzabu ya mantwala. Oh, la la!

²⁵¹ Beno kele na boma ya yinki? Kuyituka ve ti Yandi tubaka, “Beno vwanda na boma ve; mu kele Yandi yina kufwaka mpe ke zinga diaka; mpe Mu ke zinga kukonda nsuka; mpe ke na bafungula ya lufwa mpe difelo.” Beno vwanda na boma ve ya kima mosi. Ata mpe lufwa ke sala beno mpasi ve. Beno tala. Kitoko!

Beto kwenda na nswalu nionso ntangu yayi.

²⁵² Mukanda ya muswa yina ba lendaka telemina ve! Mfuka me kumana. Bima nionso vwandaka telemina yawu me zimbana. Ha-ha-ha! Nkembo! Mu lenda sala buzoba, kasi mu ke na kuwa mbote. Beno tala. Beno me mona? Oh, mukanda ya muswa yina ba lendaka telemina ve, beno zaba yinki ya zola kutuba? Beno me bakula yina ya zola kutuba, mpangi-bakala? Kima mosi ve lenda katula yawu na beno. Amen. Mu kele na mukanda ya muswa. Amen. Yinki. . .

²⁵³ Yinki mukanda ya muswa? Mu kele na muswa ntangu yayi mutindu ndandu, ya lufwa ya Yandi, luzikulu, mpe mvumbukulu. Yandi kumaka munu, samu ti mu kuma Yandi. Ntangu yayi, Yandi kumaka nsumuki, ti mu lendaka kuma mwana ya bakala, amen, mpe kusimba mukanda ya muswa yina

ba lendaka telemina ve. “Samu ti bidimbu yayi ke landa bayina ke kwikila,” beno me mona, mukanda ya muswa yina ba lendaka telemina ve!

Ntangu yayi na nswalu nionso, ntete. . . Beto me bikana na baminuti kumi dyaka.

²⁵⁴ Beto tala ntangu yayi, na nswalu nionso, nkindusulu ya Mpeve. Mu ke talisa na beno mwa bidimbu samu ti beno bakula. Beno tala, ntangu yayi beno tala mbote yina, “Ngolo ya nkindusulu” yayi vwandaka dilongi ya munu. Na manima Mwana me vumbuka, tala mutindu Yawu salaka na zulu ya bawu na Pentecote, yina Yawu salaka na bawu, yina Ngolo yina ya nkindusulu salaka na bawu. Yawu kindisaka bawu.

²⁵⁵ Ntangu yayi beto tala yina Yawu salaka na zulu ya Etienne. Etienne fulukaka na Ngolo ya nkindusulu. Yina kele kieleka ve? Beno me mona, yandi vwandaka ya kifuluka na Ngolo ya nkindusulu. Yawu pesaka yandi boma ve. Yandi tubaka, “Beno bantu ya nkingu ya ngolo mpe yina me bakaka nzengolo ve na kati ya bantima mpe makutu, beno ke tumamaka ve ntangu nionso na Mpeve-Santu; mutindu batata ya beno kusalaka, mutindu mosi beno ke sala. Nani na kati ya bapofete yina zabisaka nkwizulu ya Muntu ya Kieleka, yina batata ya beno losaka matadi ve?” Oh, la la! Yawu salaka kima mosi samu na yandi. Ya kieleka, yandi vwandaka ya kifuluka na Ngolo ya nkindusulu.

Mpe bawu tubaka, “Beto ke kabwana na mwana-bakala yina!”

²⁵⁶ Mpe ntangu yandi kufwaka, ba losaka yandi matadi; mpe mwa yintu ya yandi ya mawa, matadi vwandaka bula mutindu yina. Yandi talaka na zulu mpe tubaka, “Mu ke mona Mazulu me zibuka.” Ngolo ya nkindusulu vwandaka sala. “Mu ke mona ti Mazulu me zibuka, mpe Yesu me telama na diboko ya kibakala ya Nzambi.” Yawu yina Ngolo ya nkindusulu salaka na Etienne.

²⁵⁷ Beno tala muntu yankaka, yina vwandaka na Ngolo yayi ya nkindusulu, nkumbu ya yandi vwandaka Philippe. Yandi vwandaka ya kifuluka na Ngolo ya nkindusulu. Yandi vwandaka na lukutakanu ya nene kuna na Samarie. Ba vwandaka basisa bampeve ya yimbi. Bantu botamaka na Nkumbu ya Yesu Klisto. Bawu vwandaka na lukutakanu ya kieleka. Mpe Mpeve tubaka na yandi, oh, Dynamique kwisaka, mpe Yawu tubaka, “Bika reveil yayi.” Kasi yinki balongi ke tuba? Yina bawu ke tuba ke sala luswaswanu mosi ve. Beno me mona? Yandi vwandaka ya kifuluka na Ngolo ya nkindusulu. Yandi vwandaka na essence, mpe Dynamique vwandaka kulumuka na zulu ya yandi. Yandi tubaka, “Kwenda kuna na ntoto ya kuyuma.”

258 Mpe yandi monaka nsoniki mosi kuna, mpe botikaka yandi na Nkumbu ya Yesu Klisto; muntu mosi, yina bakaka Nsangu na Ethiopie. Ya kieleka? Mpe yandi tumamaka na Nzambi.

259 Na kutumama na Nzambi, kana beno me kuzwaka ntete ve mbotika na Nkumbu ya Yesu Klisto, beno sala yawu, mpe beno tala Ngolo ya nkindusulu ke kanga beno. Beno me mona?

260 Ntangu Étienne salaka kima yayi ya nene. . . to, Etienne ve. Kasi Philippe salaka kima yayi ya nene, samu na kubika reveil yina ya nene mpe kutumama na misiku ya Nzambi, ntangu yandi fulukaka, na kufulukaka. . . Na kubotikaka nsoniki yayi, na kutumama na Nzambi, yandi fulukaka mingi na Ngolo ya nkindusulu ti Yawu zangulaka yandi. “Ya ke pesa beno mpasi na nzutu ya beno yina ke kufwa, kana Mpeve yayi me vumbula Yesu na lufwa.” Yawu kindisaka Philippe ti yandi vwandaka mona ve ba-kilometre nkama zole na makumi yiya, na kisika yina yankaka, na yinsi yankaka. Yawu kindisaka nzutu ya yandi ya lufwa. Wapi mutindu yandi salaka yawu? Yandi vwandaka ya kufuluka mingi na Ngolo ya nkindusulu.

261 Oh, Dibuundu ya Nzambi ya moyo, beto lendaka ve kubikana awa na kulekitaka mwa bitini ya sukadi mutindu beto ke na yawu bubu yayi awa. Beto fwana vwanda ya kufuluka mpe beto zanguka na atimosifere ya bisambu, na Ngolo ya nkindusulu, tii na nkindusulu ya Mpeve-Santu! Beto fwana zanguka, kilumbu mosi, na Enlevement yina kuna. Yinga, tata. Amen! Oh, la la!

262 Beno lemvokila munu samu na nzonzolo yina. Mu vwandaka banza na mama yina ke salaka mwa basaki yina, mutindu ya vwanda vwandaka na ntangu me luta, samu na bébé. Mingi na kati ya beno ba-bamama ya biboba ke bambuka moyo na yawu. Mwa bébé ya fioti vwandaka dila; ba vwandaka baka mwa matiti ya café mpe mwa sukadi, ba vwandaka vinga yawu na kati ya saki mpe ba vwandaka bika yandi kufiba yawu, kaka samu na kulembika yandi. Ya kele na ngolo kuna na kati. Ya ke kufwa yandi. Beno me mona? Mwa caféine yina kele kuna na kati, mpe nionso yina, ba ke yika mwa sukadi samu yandi kumina yawu, ya kele caféine yina yandi ke kunwa kuna.

263 Beto me lembe samu na bima yina. Beno vutuka! Beno kele bangononi; beno vutuka na Ndinga ya Nzambi! Beno vwanda na kikesa; kima mosi lendaka kuniongisa beno, na yina beno kele na kimpwanza na mansoni nionso ya muntu. Yina nionso muntu nionso na beno, yina ke nata kaka zola mingi. Amen. Mpe, Ngolo ya nkindusulu, me zanguka na bisika ya Mazulu, ngononi yina me pumbuka na zulu ya bansusu, na zulu mingi kuna na bisika ya Mazulu na Klisto Yesu! Oh!

Ya vwandaka na zulu ya Philippe. Yina kindisaka yandi, zangulaka yandi.

264 Beto baka muntu yankaka. Ya vwandaka na muntu mosi na nkumbu ya Enoch. Ntangu yayi, yandi vwandaka tambula na

konso Ndinga ya Nzambi, bamvula nkama tanu lutaka. Yandi vwandaka na kimbangi, ti, “Ata mbala mosi ve ti mu kondwaka kuzitisa Ndinga ya Yandi.” Yandi vwandaka ya kufuluka na Ngolo ya nkindusulu ntangu Dynamique kulumukaka na zulu ya yandi, na zulu ya Mekaniki, ti yandi zolaka kufwa ve; yandi mataka kaka na Yinzo. yandi bandaka kaka na kutambula. Yandi vwandaka kaka. . . Mutindu Philippe, yandi vwandaka ya kufuluka na Ngolo ya nkindusulu, na kisika ya kukwenda kuna na Gaza mpe kukwenda kisika yankaka, kuna, ba monaka yandi kuna na bizunga ya mazulu. Na kisika ya kusala mutindu yina, yandi kwendaka kuna, oh, yandi tubaka, “Mu kele bakala ya kiboba, na mutindu nionso. Mu kele kaka Ngolo mingi ya nkindusulu, mu ke katuka na ntoto na kutambulaka.”

265 Ya kele Ngolo ya nkindusulu ya mutindu mosi beto kele na yawu na ntangu yayi. Beno me mona, Yawu ke kindisa nzutu ya beno ya lufwa. Ya kele kieleka? Ya kele Bangolo ya nkindusulu.

266 Enoch, na kimbangi yango ya kulunga, ti, “Nyonso yina Nzambi tubaka na munu na kusala, mu salaka yawu. Nionso yina mu monaka Yandi tubaka samu na munu, mu salaka yawu.” Mpe yandi kumaka ya kufuluka na—na Dynamique, to—to Mekaniki, tii kuna, ntangu Ngolo ya nkindusulu bulaka yandi, Mekaniki, Yawu zangulaka yandi kuna na zulu. Yandi basikaka na ntoto, mataka na Mazulu.

267 Ntangu yayi, beno tala, na zulu ya Elie. Na manima. . . Beno tala, Elie, profete yina ya nene, muntu mosi na kilumbu ya yandi. Beno lemvo kila munu. Mpangi-bakala, mpangi-kento, na kilumbu yina yandi teleminaka ngolo bakento yayi ke pakula, ba-Jézabel yayi mpe ba-Achab. Mpe telamaka tii. . . Mpe muntu mosi ve, na kutala, telamaka na lweka ya yandi. Mpe yandi sembaka, mpe nwanisaka, mpe telamaka kuna, mpe Nzambi kebaka yandi mpe sadisaka yandi na kisika nyonso. Beno zaba, kiboba yayi kulembaka kilumbu mosi. Yandi tubaka, “Mu ke na kukumaka kiboba, na yawu mu lenda kwenda diaka ntama ve.” Yandi vwandaka landila na kukwenda, mu banza, bamvula makumi yivwa; kiboba ya kieleka, mpe yandi vwandaka tambula kuna, mpe yandi vwandaka na Ngolo ya nkindusulu. Beno zaba yinki? Yandi talaka na simu ya Jourdain.

O Nzambi! Mu lenda mona kaka na lweka yankaka. Beno ve?

268 Yandi vwandaka ya kufuluka na Ngolo ya nkindusulu, ti, yandi monaka pusu-pusu mosi ya kukanga kuna, mwa bampunda ya Tiya mpe pusu-pusu ya Tiya, ya kukanga na yinti mosi kuna. Yandi zabukaka kaka nzadi mpe kwendaka na Yinzo, kukondwa kufwa. Ngolo ya nkindusulu ba fidisaka, salaka ti pusu-pusu kukulumuka na Mazulu mpe kuzangula yandi. Ya katulaka mpe kazaka ya yandi mpe losaka yawu kuna samu na Elie. Ya kieleka.

269 Ntangu yayi, na yina muntu yina bakaka robe yina, kifwanukusu ya Dibuundu diaka, beno me mona, yandi lokotaka robe yina. Ntangu yayi, yandi salaka bambala zole bimangu, yina kele kifwanukusu ya Klisto mpe Dibuundu. Beno me mona? Elie salaka yiya; yandi salaka nana. Beno me mona, ntangu yayi, yandi vwandaka—yandi vwandaka na ngolo zole, samu yandi lombaka yawu. “Bima ya kulutila nene yayi yina Mu ke sala.” Beno me mona? Kasi yandi vwandaka ya kufuluka na Ngolo ya nkindusulu, mpe nionso yina, tii yandi salaka nionso yayi, mbala zole, yina Élisée salaka, kulutila yina yandi salaka. Mpe beno tala, yandi zingaka luzingu mosi tii pene ya bamvula makumi nana to makumi yivwa, yandi kumaka kiboba mpe yandi—yandi kufwaka. Yandi kufwaka, mpe bawu—bawu nataka yandi na nganda mpe zikaka yandi.

270 Beno zaba, mbote, Ngolo yina ya nkindusulu bikaka yandi ve. Bamvula mingi, mingi na manima ya yina, ntangu nsuni vwandaka me bola na mikwa ya yandi, yandi vwandaka kuna na ntoni. Mpe bawu vwandaka nata muntu mosi ya kufwa kilumbu mosi, mpe bawu monaka mbeni, mpe bawu losaka kaka bakala yayi na zulu ya mikwa ya Elisée. Ya vwandaka na Ngolo mingi ya nkindusulu na zulu ya mikwa yina tii kuna bakala yina vutukaka diaka na luzingu. Oh!

271 “Ya ke kindisa nzutu ya beno ya lufwa.” Ata ti yawu me kufwa mpe me kubola na kati ya ntoni, mpe kasi Ngolo yina ya nkindusulu vwandaka kuna na putulu yina. Alleluia! Uh! “Yandi yina vumbulaka Klisto na lufwa diaka ke kindisa nzutu ya beno ya lufwa.” Élie na manima kuna, Élisée mpe Élie. . .

272 Beno bambuka moyo, bakala yina ya kufwa, profete yina, ya kufuluka na Ngolo yina ya nkindusulu, vwandaka kuna na kati ya ntoni mpe bolaka; ya vwandaka na Ngolo mingi ya nkindusulu, na yina, ba losaka muntu ya kufwa na zulu ya yandi, yandi vutukaka na luzingu. Yandi lenda dyaka tentika maboko na zulu ya bambevo. Yandi lenda ve? Amen. Beno bawu yayi.

273 Mpe beno bambuka moyo, beto kele nsuni ya nzutu ya Yandi, Yesu Klisto. “Beto kele nsuni ya nsuni ya Yandi, mpe mikwa ya mikwa ya Yandi.” Oh, ya kele ve na nzila na nganda ya yawu. Beto ke vumbuka, yawu yina kaka. Beno ke vumbuka, yawu yina kaka.

274 Paki zola kutuba mingi kulutila kinkulu. Ya kele diaka ntangu yayi, samu na banzutu ya beto me kindisama na yandi mpe beto kele ya kuvwanda na bisika ya Mazulu.

275 Mpe nzutu yayi lendaka bola na nzadi; yawu lendaka bola na ntoto; ya lendaka bikana diaka ve na lutu ya mbombi; kasi yandi ke basika. Samu, Mpeve yina vumbulaka Mfumu ya munu na lufwa me kindisa nzutu yayi ya lufwa. Ya me kindisa nzutu ya beno ya lufwa. Mpe beto kele bantu ya yandi ya mvumbukulu ya Yandi, pulusu ya Yandi ya Luzingu ya Kukonda nsuka yina

mu ke zonzilaka mingi, beno zaba. Kuyituka ve ti Yandi tubaka, “Kuvwanda na boma ve.” Yandi zabaka.

²⁷⁶ Samu mutindu Paul tubaka, “Lufwa, wapi ntunga ya nge? Ntoni, wapi lunungu ya nge? Mu ke ya kufuluka na Ngolo ya nkindusulu. Matondo na Nzambi, Yina pesaka beto lunungu na nzila ya Mfumu ya beto Yesu Klisto.” Yinga, tata! Ngolo ya nkindusulu. Oh, la la!

²⁷⁷ Yandi ke zinga kukonda nsuka, “mutindu mosi mazono, bubu yayi, mpe kukonda nsuka.” Hebreux 13:8. Beno tala, Mesiya, Yina ba me pakula; mutindu mosi kele Kento ya Yandi ya makwela, ba-Mesiya ya fioti, beno me mona, Yina ba me pakula.

²⁷⁸ Beno tala, lufwa ke kanga ve Ngolo ya Nzambi ya nkindusulu. Lufwa lenda kanga Yawu ve. Ntangu beno kele na Yawu, Ya kele ya Kukonda nsuka. Kima mosi ve ke telemisa Yawu. Beno lendaka ve kukanga Yawu; beno lendaka ve—lendaka ve kusala kima mosi na Yawu. Beno zinga luzingu ya beno nionso, yawu yina ve ke telemisa Yawu; Yawu ke vwanda kaka na ngolo.

²⁷⁹ Beno tala, Moise vwandaka ya kufuluka na Ngolo yina ya nkindusulu. Yandi vwandaka? Yandi vwandaka profete yina Ndinga kwisaka. Yandi vwandaka kitini ya Ndinga. Yandi vwandaka Ndinga ya kilumbu yina. Ya kieleka? Mpe na manima yandi kufwaka, bamvula bankama nana; na zulu ya Mongo ya Nsobolo, kuna yandi vwandaka, na Élie. Ya kieleka? Ngolo ya nkindusulu, lufwa ke katula yawu ata fioti ve. Ve, ve. “Mu ke vumbula yawu diaka.” Bawanzio kwizaka; ba zikaka yandi kuna na kiwanda. Yandi bolaka mpe kwendaka, mikwa ya yandi vwandaka diaka ve, mpe bima yankaka, kasi Ngolo ya nkindusulu vwandaka kaka kuna. Yawu kindisaka yandi mpe zangulaka yandi kuna. Mpe yandi vwandaka kuna, me telama kuna. Beno tala.

²⁸⁰ Beno ke tuba, “Ya kieleka, Mpangi Branham, na manima ya bamvula bankama nana?” Oh, la la!

²⁸¹ Kana beno tanga na Matthieu, mu kele na Masonuku, Matthieu 27:51. Beno lenda sonika yawu, beno sonika yawu. Ntangu bayina nionso kuna na manima, bayina kwikilaka ti Yandi ke kwisa...Biblia me tuba awa, na manima Yandi kwisaka, ba vwandaka ya kulala na ntoto. Ngolo ya nkindusulu vwandaka na zulu ya bawu, mpe ba vwandaka kitini ya Yandi, basantu yina. Bawu vwandaka kitini ya Yandi, samu bawu kwikilaka na Yandi.

²⁸² Na kutala ba vwandaka na Luzingu yina, na nzila ya munkayulu ya dimeme, mulemvo, yina lendaka ata fioti ve kuvutula mpeve ya dimeme na zulu ya muntu. Wapi mutindu ntangu yayi na Mpeve ya Muntu, Nzambi Yandi mosi, na zulu ya beno, beno me mona, wapi mutindu beto kele na Ngolo mingi ya nkindusulu! Kasi mutindu mulemvo samu na disumu ba

vwandaka pesa mwana-dimeme, na kifwanukusu. Yina beto kele na yawu kele ve kifwanukusu; ya kele kieleka. Yinki beto ke na kubanga? Mpe bampangi yina vwandaka kaka na kifwanukusu, samu na kutalisa na mvumbukulu ya Yandi, mpe kulumukaka na ntoni na yawu.

²⁸³ Mutindu Job kuna na ntangu yina misisa ya yandi ya yintu kotaka na kidi-kidi ya nene, oh, ba botulaka yandi bima nionso! Diabulu tubaka, “Bika mu kuzwa yandi. Mu ke sala ti yandi kusinga Nge na ntwala ya Nge.” Mpe na yina yandi natamaka.

²⁸⁴ Yandi tubaka, “Kubaka luzingu ya yandi ve.” Mpe yandi salaka (yandi) nionso yina kasi bakaka ve luzingu ya yandi.

²⁸⁵ Mpe kento ya yandi mpe mangaka yandi. Yandi vwandaka tuba ti mupepe ya yandi kumaka nzenza samu na yandi. Na nzonzolo yankaka, yandi—yandi zolaka vwanda ve na kima ya kusala na yandi. Ya monanaka ti yandi vwandaka zola yandi diaka ve, yandi vwandaka kaka kupusa yandi. “Job, nge kele muntu ya mawa! Samu na yinki nge lenda ve kusinga Nzambi, mpe kufwa?”

Yandi tubaka, “Nge ke tuba mutindu kento ya zoba.” Oh, la la!

²⁸⁶ Beno me mona, yandi telamaka kaka na yina yandi vwandaka na yawu. Ntangu yayi, yandi vwandaka profete. Yandi tubaka, “Mu kele nsumuki ve. Mu pesaka munkayulu yina ba ke pesaka.” Amen. Yandi zabaka kisika yandi telamaka. Yandi vwandaka na Ndinga. Ata ti yina bantu yankaka vwandaka tuba, yandi vwandaka kaka kuna na Ndinga. Na manima na ngunga ya nene yayi. . . Yandi tubaka, “Nge ke tuba mutindu kento ya zoba.” Yandi tubaka, “Mfumu me pesa, Mfumu me baka; na yina, nkembo na Nkumbu ya Mfumu!” Yandi tubaka, “Mu kwisaka na yinza yayi kukondwa kima mosi. Mu kwisaka awa, kinkonga, mu ke kwenda mutindu mosi. Nkumbu ya Mfumu kusakumuka!” Yandi vwandaka kuna, ya kifuluka na bamputa, bana ya yandi kufwaka, yandi vwandaka mputu, mpe bankundi ya yandi mangaka yandi, bamambeke ya dibuundu ya yandi, nionso yankaka, yandi vwandaka kukikwanga na . . . Mpe wapi muntu yayi ya kiadi! Ata mosi ve na kati ya beno me lutaka nte na nzila yina. Kasi, yandi simbaka Ndinga yina.

²⁸⁷ Yandi vwandaka ngononi. Oh, la la! Beno lenda ve kukanga meso ya yandi ntangu nyonso. Ve, ve. Na mbala mosi, na kutelemaka na Ndinga yina, yinki salamaka? Mazulu zibukaka, mpe banzasi bandaka na kungana, bansemo bandaka na kusema, mpe Job talaka na zulu mpe yandi monaka vision, yandi tubaka, “Mu zaba ti Mukudi ya munu kele moyo. Na bilumbu ya nsuka Yandi ke telema na zulu ya ntoto yayi. Mpe ata ti na manima misobi me bebisa nzutu yayi, mikwa mpe nionso, Ngolo yina ke vwanda kuna. Mu ke mona Nzambi samu na munu mosi, Yina mu ke mona samu na munu mosi. Meso ya munu ke tala mpe muntu

yankaka ve.” Ya kieleka? “Ata ti ba-rein ya munu me beba na kati ya munu, ata ti na manima misobi yina kele na kati ya nzutu ya munu ntangu yayi, ke bebisa yawu.”

²⁸⁸ Beno zaba, misobi ya mpusu ya beno ke kwisa na beno ve. Musobi yina kele dezia na kati ya beno, misobi ya mpusu ya beno. Beno me bakulaka yawu ntete? Ba tula beno na kati ya sanduku mosi, mpe ba kanga yawu ngolo; musobi ke kudia kaka beno, samu yawu kele na kati ya beno. Beno kele kaka kinkuku ya misobi, na kubanda, kuna na kati.

²⁸⁹ “Ntangu misobi ya mpusu, misobi ya mpusu ya munu ke bebisa munu, nsuni ya munu, kasi na nsuni ya munu mu ke mona Nzambi.”

²⁹⁰ Mpe na suka yina ya mvumbukulu! Nkembo! Alleluia! Matthieu, musoniki yayi ya nene, 27:51, me tuba, “Na manima Yandi me vumbuka na lufwa, basantu yina ya Ngwisani ya Ntama, mingi na kati ya bayina vwandaka ya kulala na putulu ya ntoto, basikaka na ntoni, mpe kotaka na mbanza mpe monanaka na bantu mingi.” Ngolo yina ya nkindusulu, vwandaka kaka na zulu ya mikwa ya Elie ntangu ya vwandaka diaka ve na mikwa, ya vwandaka kaka na zulu ya Job ntangu ya vwandaka ve na lutu ya putulu bikanaka na nzutu ya yandi. Kasi Ngolo ya nkindusulu vwandaka kaka kuna.

²⁹¹ “Kana Mpeve yayi vumbulaka Yesu na lufwa ke zinga na kati ya beno, Yandi ke kindisa mpe nzutu ya beno ya lufwa.” Beno tala, na nswalu nionso ntangu yayi.

²⁹² Beno ke tuba, “Oh, mu zolaka zinga na . . .” Beno ke zinga na ntangu ya mbote. Ntangu yayi kana beno nionso . . .

²⁹³ Mu ke mona ti beno ke sonika mwa Masonuku. Mbote mingi, beno sonika ba-Théssalonissien ya Ntete 4:16. Beno tala wapi mutindu ya kele kitoko, beno me mona. Na . . . “Basantu, bayina me lala kati na Klisto, Nzambi ke nata na Yandi,” beno me mona, basantu na kati ya ntoni, ke pema. Mutindu Elie vwandaka; bayankaka mutindu Elisée; beno me mona, bayankaka na kati ya bawu ke kindisama, bayankaka ke zanguka, bayankaka ke vwanda na kati ya ntoni. Bawu ke kwenda na Yandi. “Mpungi ya Nzambi ke bula, mpe bayina kufwaka kati na Klisto ke vumbuka ntete na lufwa. Mpe beto yina ke vwanda na moyo mpe ke bikala ke zanguka na zulu kintwadi na bawu, samu na kukutana na Mfumu na mupepe.” Ngolo ya nkindusulu na zulu ya bantu ya moyo; Ngolo ya nkindusulu na zulu ya bantu ya kufwa. Beno me mona?

²⁹⁴ Ngolo yina mosi ya nkindusulu ya Nzambi me monisama na kati ya bapofete yayi zole. Beno tala bankumbu ya bawu, kele kaka mutindu mosi, Elisée, Elie. Beno me mona Kento ya makwela mpe Bakala ya makwela? Mosi ya bawu kele Tata Yesu; yankaka yina kele Mama Yesu. Beno me mona, kaka—kaka mutindu mosi na kati-kati ya Yandi mpe Kento. Beno me mona?

²⁹⁵ Elie, mpe tala mutindu ya ke na kutalisa yawu awa. Ntangu yayi, Élisée. . . Ba zangulaka yandi na enlevement, ke talisa Dibundu, mbote mingi, Elie; mpe Elisée pemaka tii na mvumbukulu. Beno me mona? Ya kele kaka mutindu ndeke, ke na nsatu ya mapapu zole samu na kutelama mbote-mbote. Beno me mona? Dibundu talisamaka kuna na kati ya bapofete yina zole. “Samu beto yina ke vwanda ya moyo mpe ke bikala na nkwezulu ya Mfumu, ke pekisa ve bayina kufwaka; samu ti Mpungi ya Nzambi ke wakana,” mapapu nyonso zole ke vukana, mpe beto ke pumbuka, alleluia, ke pumbuka. Samu, (yinki?) na kati ya bantu ya moyo, mutindu mosi bantu ya kufwa, Ngolo yina ya nkindusulu kele kaka ya moyo.

²⁹⁶ Beno tala. Beno bambuka moyo, beno bambuka moyo ntangu yayi, me kindisama samu na kumona yina me tala bima yayi. Beno tala Ngolo ya nkindusulu ya kilumbu yayi. Beno bambuka moyo, beto me kindisama. Ntama mingi ve, samu na lusalusu. . .

²⁹⁷ Mpe mu—mu banza ti Mfumu ya beto tubaka, mpe mutindu Paul tubaka, “Yina Tata lakisaka munu, mu me bumba kima ve na beno. Mu me tuba na beno.” Mpe na bilumbu yayi ya nsuka ntangu beto monaka Ngolo ya Yandi ya nkindusulu na zulu ya beto, Yandi ke pesaka beto Ngolo ya nkindusulu, samu na kumona bambevo kubeluka. Beto me monaka Ngolo ya Nkindusulu ke sala na kati ya beto, mutindu Yawu vwandaka na ntangu yina na zulu ya bawu na bilumbu ya ntete, beno me mona, beno ke mona Yawu kuvutula na nzila ya vision mpe kuvumbula bambevo, beto ke mona Yawu kubelula bambevo.

²⁹⁸ Kilumbu yina mu vwandaka tuba na muntu mosi. Na Donavon Weerts ya fioti awa, mu banza ti beno nionso kuzaba yandi. Mu vwandaka zomba na yandi. Mwa muntu yayi ya mputu. . . Yandi kele mwana-bakala ya mbote ya ntwenya. Yandi ke kwizaka awa na yinzo-Nzambi. Yandi ke. . . Nkundi ya munu mosi ya mbote. Mpe yandi kaka. . . Yandi tubaka, “Mu zolaka ve kuyangisa nge.”

²⁹⁹ Mu talaka, mpe dikutu ya yandi, vwandaka ya kuvimba na nganda. Mpe mu tubaka, “Wapi faso nge kele, Donavon?” Mu simbaka yandi kaka na diboko, mutindu *yayi*, mpe cancer. Mu tubaka, “Donavon, yinki diambu na dikutu ya nge?”

³⁰⁰ Yandi tubaka, “Kuzaba ve, Mpangi Branham. Pene ya bangonda sambanu, sambwadi, mpe ya ke landila kaka na kukuma. . .”

Mu tubaka, “Samu na yinki nge me tuba kima mosi ve samu na yawu?”

³⁰¹ Yandi tubaka, “Mu—mu vwandaka zola ve kuyangisa nge, Mpangi Branham.”

Mu tubaka, “Nge zaba yinki ya kele?”

Yandi tubaka, “Mu ke na dibanza mosi ve.”

302 Mu tulaka diboko ya munu na zulu ya yandi, mu tubaka ata fioti ve ndinga mosi. Bilumbu zole na manima ya yina, ya vwandaka diaka ve na kidimbu ya mputa. Yinki yina? Ngolo ya nkindusulu, beno me mona, Ya ke kindisa nzutu ya beno ya lufwa. Ya zolaka zenga dikutu ya yandi, butomfo ya yandi zolaka kwenda, beno me mona, yandi zolaka kufwa. Kasi, Ngolo ya nkindusulu! Beno me mona?

303 Mpe kilumbu mosi ntangu mu vwandaka ya kulemba, munu mosi, na yina me tala. . . Mu tubaka, “Kana nge. . . Mwanabakala, nge ke sala mbote na kukwenda na ntwala, nge kele na bamvula makumi tanu. Nge, kana nge ke sala kima mosi samu na Mfumu, kulutila mbote kusala nswalu mpe kusala yawu. Nge me kuma kiboba.” Beno me mona? Mpe kuna na suka yina, Ngolo ya nkindusulu kwisaka, mpe Yandi bikaka mu tala na simu yina, mpe mu monaka beno nionso kuna. Uh-huh. Beno me mona? Yandi tubaka, “Bayina nionso nge ke zolaka, mpe bayina nionso ke zolaka nge, ba me pesa bawu na nge.” Beno me mona? Mu monaka bawu nionso kuna mutindu yina. Yinki ya vwandaka? Ngolo ya Nkindusulu.

304 Jean kimonisi vwandaka ya kifuluka na Ngolo ya nkindusulu, yandi telamaka kuna mpe monaka nsuka na mbandukulu.

305 Esaie vwandaka ya kifuluka na Ngolo ya nkindusulu, mpe telemaka kuna mpe monaka Millenium mpe nionso yina.

306 Ngolo ya nkindusulu! “Mpe kana Mpeve yina vumbulaka Klisto na lufwa, ke zinga na kati ya beno, Ya ke kindisa nzutu ya beno ya kufwa. . . nzutu yina ke fwaka.” Beno bambuka moyo, Ngolo ya nkindusulu!

307 Beno tala yina beto me mona na kilumbu yayi. Ngolo ya nkindusulu me kwisa na beto, samu na kuzibula Bidimbu Sambwadi. Yinki yayi, mayele ya muntu? Ve, Ngolo ya nkindusulu ya Nzambi. Beno me mona, Ngolo ya nkindusulu ya Nzambi tubaka na ntwala ti yayi ke salama. Beno me mona, Ngolo ya nkindusulu ya Nzambi salaka ti yinza kupesa kimbangi na Yawu, ya kele Kieleka. Wanzio ya Mfumu, mu tubaka na beno, vwandaka pene-pene, na Dikunzi ya Tiya; Ngolo ya nkindusulu bikaka yinza kupesa kimbangi ti Ya kele Kieleka. Mpe, na yina, ba vwandaka zaba ve yina Yawu vwandaka; mpe beto me zaba, beno tala kaka na lweka *yayi*, mpe Ya kele Mfumu ya beto kuna na zulu, beno me mona.

308 Yandi kele Yandi Yina zibulaka Bidimbu yina. Yandi kele Bidimbu yina, samu ti Ndinga nyonso ya Nzambi kele Klisto, mpe Klisto kele Bidimbu yina me zibuka. Yinki kele kuzibuka ya Bidimbu na ntangu yina? Ya kele kumonisama ya Klisto.

309 Mpe Bawanzio sambwadi, yina vwandaka talisa Mabuundu Sambwadi ya muvimba, mpe beto lendaka mona Yawu ve. Bawu salaka yawu, bawu bakaka foto, beto ve. Mpe kuna Yandi kele, ya

kutelema kuna, Zuzi ya Nene; na kulakisaka ti Yandi keke Alpha mpe Omega, mbandukulu mpe nsuka. Wapi kutalisama! Ngolo ya Nkindusulu salaka yawu samu na beto.

³¹⁰ Ngolo ya nkindusulu ke bika beto mona nkwezulu ya Yandi. Ngolo ya nkindusulu bendaka beto na lufwa mpe nataka beto na Luzingu. Ngolo ya nkindusulu ke pesaka kuswasikisa mabanza; samu na kuzaba yina ke tambula mbote ve na beno, mpe yinki kusala; yina beno me sala, mpe yina beno lendaka sala ve; mpe yina beno lendaka sala, mpe yina beno ke vwanda. Ngolo ya nkindusulu, bima yayi nionso!

³¹¹ Mfumu ya beto Yesu keke ya kufuluka na Ngolo ya nkindusulu, Yandi vwandaka nionso ya Yawu, kintwadi. Yandi vwandaka ya kufuluka na Ngolo ya nkindusulu, Yandi tubaka mutindu yayi, “Benoni bebisa nzutu yayi, mpe mu ke vumbula yawu na bilumbu tatu.” Benoni ke tubila kivuvu na Ngolo ya nkindusulu! “Benoni bebisa nzutu yayi, mpe Mu ke . . . tempelo yayi, mpe Mu ke telemisa yawu na bilumbu tatu.”

³¹² Samu na yinki, samu na yinki Yandi vwandaka tuba mutindu yina? Yandi zabaka ti ya vwandaka ya kusunama samu na Yandi, beno me mona, ti ya vwandaka ya kusunika samu na Yandi, na Ndinga ya Nzambi yina zolaka ve kubwa. Ndinga tubaka, “Mu ke bika ve Muntu ya Muntu ya Santu kumona kubola, to dyaka Mu ke bika moyo ya Yandi na difelo.” Mpe Yandi zabaka ti Ngolo ya nkindusulu ke vumbula Yandi, ti ata cellule mosi ve ke bola.

³¹³ Yandi tubaka, “Benoni bebisa tempelo yayi, mpe mu ke vutula yawu diaka na bilumbu tatu.”

³¹⁴ Samu na yinki? Ya vwandaka profesu, Ndinga ya Nzambi. Mpe profesu, kana Yawu keke kieleka Ndinga ya Nzambi, yawu lenda kubwa ve. Mpe profesu yina mosi mpe Ndinga ya Nzambi yina tubaka ti Yandi ke vumbula Yandi, ke tuba ti beto me vumbuka dezia na Yandi. Kuyituka ve ti Yandi tubaka, “Benoni vwanda na boma ve.” Mpe yawu me sonamaka, ti, “Mpeve yina keke na ntangu yayi, vwandaka na kati ya Yandi, ntangu yayi na kati ya beto, ke kindisa diaka nzutu ya beto ya lufwa.” Kuvwanda na boma ve, nkundi, M-w-a-n-a me basika. Mwana me basika. Ve . . .

³¹⁵ Ntangu yayi beno tala na mongo ya nsobolo. Beto vwandaka, mosi na mosi, talisamaka kuna. Ya vwandaka na basantu ya moyo yina ba zangulaka, ya vwandaka na Elie ya kutelama kuna; mpe kuna telamaka Moise, basantu ya kufwa yina yandi vwandaka tali- . . . Diaka, bawu zole vwandaka na Ngolo ya nkindusulu. Ata ti mosi kufwaka, mpe yina yankaka kufwaka ve, bawu nionso vwandaka kuna.

³¹⁶ Benoni tala, oh, benoni tala yina beto ke na kumona na bilumbu yayi ya nsuka. Kima mosi yina Yandi silaka, Jean 14:12. Ntangu yayi beno tala . . . [Kisika ya mpamba na bande—Mu.] Kieleka.

Bantu ke tuba, “Beno ke tubaka ti beno kele na ngolo?”
Ve, ve, ve.

³¹⁷ Beto kele kaka mutindu bawu na Mongo ya Nsobolo, beno me mona. Kieleka, beto ke tubilaka ve ngolo. Kasi, beto, mutindu—mutindu bawu vwandaka. . . Na zulu ya Mongo ya Nsobolo, ba vwandaka tuba ve, Moïse, kutuba, “Beno tala nani, beno tala nani mu kele,” bilandi kutuba, “beno tala nani mu kele, beno tala nani mu kele.” Beno zaba yina salamaka? Beno tala, bawu monaka Yesu na nkembo. Yawu yina kaka bawu zolaka mona kumonisama, Yesu na nkembo.

³¹⁸ Mpe ya ke mutindu yina bubu yayi, beto ke meka ve na kuvwanda muntu mosi ya nene. Beto ke tala ve yina bantu ke tuba samu na beto. Nkumbu ya beto kele kima mosi ve; ya kele Nkumbu ya Yandi. Luzingu ya beto, ya kele kima mosi ve; ya kele Luzingu ya Yandi. Ya kele Ngolo ya Yandi, ngolo ya beto ve. Mpe ya kele kaka na kima mosi yina beto ke zolaka kusala, kele kumona Yandi na nkembo. Mpe wapi mutindu ya lenda vwanda? Ntangu Yandi ke kembisa beto, na nzila ya mvumbukulu ya Yandi yina kele na kati ya beto. Beto ke mona Yandi me talisama diaka mutindu Yandi vwandaka, bubu yayi.

³¹⁹ Beno me bakula yawu? Beno me mona, nsatu ya beto kele ve ya kubaka nkembo. Nsatu ya beto kele ve nkumbu ya nene. Nsatu ya beto kele ve kuzangula dibuundu mosi, to kuvwanda na mingi na lukolo ya Lumingu, to kumeka na kukotisa, kukanda na makulu mpe na maboko, kupusa na kati, kupesa piki-niki mosi, to kukotisa bambwetete, ba-macaron to kima mosi ya mutindu yina. Yina kele ve nsatu ya beto. Nsatu ya beto kele kumona Yandi na nkembo. Ya nkembo, (yinki?) na muyimi ya muntu mosi ve; kasi na kati ya beto, baluzingu ya beto, samu na kusiamisa ti Yandi kele moyo mpe ke zinga na kati ya beto.

³²⁰ Kana mu lendaka katuka munu mosi na nzila, na yina ntangu William Branham ke kwisa diaka ve na mabanza, mpe beno ke kwisa diaka ve na mabanza, ti beto lenda mona Yesu na nkembo na kati ya beto. Kumona Yandi, ya kele nsatu ya beto. Yawu yina nkin- . . . ke pesaka beto Ngolo ya nkindusulu. Mpe yawu ke pesaka beto kiese, samu na kuzaba ti beto kele na Yandi, na nsuni mpe mukwa ya Yandi, na kuvwandaka Kento ya Yandi ya makwela; mpe kumona mitindu ya Yandi ya kusala me siamisama, na kutalisaka na beto ti Yandi me vumbuka ntangu yayi na lufwa. Beno me mona?

³²¹ Kuyituka ve ti Yandi tubaka, “Kuvwanda na boma ve”, samu ntangu yayi, beno tala, beto me kuzwa mpulusu na nzila ya Yandi, mpe ntangu beto me vumbuka na lufwa na yandi. Yawu yina Paki zola tuba na bantu, “kuvumbuka na lufwa na Yandi”! Beno tala. Ntangu yayi beto kele na Mpeve ya Yandi na kati ya beto, mukanda ya muswa yina ba lendaka telemina ve ba me futa yawu nionso.

³²² Ve, beno ke tuba ve, “Mbote, mu banza ti mu ke sala yawu.” Beno me salaka yawu dezia. Ve, “Mu *ke* sala yawu.” Mu salaka yawu yimeni. Ata mbala mosi ve ti mu me salaka yawu; Yandi me yidika yawu samu na munu. Beno me mona? Munu ve; Yandi! “Mbote, Mpangi Branham, bawu ke tuba . . .” Mu ke kipe ve yina bawu ke tuba. Kuna Yandi salaka yawu, samu na munu. Yawu yina kaka mu ke zola, yawu yina kele na mfunu samu na munu.

³²³ Mu—mu zola kaka kumona Yandi kumonana. Wapi mutindu beno lenda sala yawu, na kukulumusaka Yandi? Ve. Yandi kele na kati ya beno. Beno me mona, Yandi kele na kati ya beno. “Mbote, na yina, Mfumu, kana mu lenda katuka na nzila, Nge lenda monana. Munu mosi . . . Wapi mutindu Nge lenda sala yawu? Samu ti Nge me tuma yawu mutindu yina. ‘Bayina nionso Tata pesaka Munu ke kwisa.’” Beno tala. Nkembo!

³²⁴ Beto me kutika banzikisa nionso, yina beto kele na yawu ntangu yayi na suka yayi, oh, mu ke banza nkunga yayi:

Na suka ya mvumbukulu yina,
Ntangu nsinga ya lufwa ke bukana,
Beto ke vumbuka na lufwa, (Alleluia!) beto ke
vumbuka na lufwa.

³²⁵ Beno ke kwikila yawu? Beto ke vumbuka na lufwa! Na Yandi beto me kuma kitini ya Yandi, Paki, kinsweki ya Nzambi me monisama mutindu ya vwandaka na ntangu yina, ya Luzingu na manima ya lufwa. Beto kele ya moyo ntangu yayi, bayina vwandaka mbala mosi ya kufwa na masumu mpe bayimbi. Kidimbu ya kieleka ya Paki me buka bansinga ya lufwa yina vwandaka ziunga munu, mpe mu ke zinga. Kidimbu ya Paki, na mbandukulu, me zibula kidimbu ya kidimbu ya Rome, Kidimbu ya Paki, na kidimbu yina ba kangaka Yandi. Mpe bantu, ntangu bawu vwandaka kufwa, ba vwandaka kwenda; kasi Yandi bukaka kidimbu mpe talisaka kinsweki. Mpe ntangu yayi Nzambi, na nzila ya Mpeve-Santu ya Yandi, me buka kidimbu yina vwandaka ziunga baluzingu ya beto, mpe Klisto me monisama ti Yandi ke zinga na kati ya beto, ti ntangu yayi beto me kindisama na Yandi. Oh, ba-page na ba-page!

Beto ke vumbuka na lufwa, (Alleluia!)
Beto ke vumbuka na lufwa! (Amen!)
Na suka ya mvumbukulu yina,
Ntangu ba ke katula bibaka ya lufwa,
Beto ke vumbuka na lufwa, (Alleluia!) beto ke
vumbuka na lufwa.

³²⁶ Oh, beno kele na kiese ve! Mu kele na kiese mingi! Ntama mingi kuna, na mwa musampa mosi ya makala, bidimbu zibukaka, mpe mu vumbukaka na Yandi, kivangu ya malu-malu. Ngolo ya Yandi ya nkindusulu; Mwana me basika.

³²⁷ Ntama mingi ve, ba tubaka na munu mwa disolo mosi samu na mulobi mbisi. Bakala mosi kwisaka mpe bakaka na ksalu

mulobi mbisi mosi ya kiboba samu na kunata yandi na Côte Ouest. Bawu kwendaka na suka yina.

³²⁸ Kana bayankaka na kati ya beno me kwendaka kuloba saumon kuna, na yina, beno zaba yina ke salamaka, ya ke vwandaka na lubungi mingi kuna. Mu ke mona leki ya munu ya bakala, Eddie Byskal, kuna, missionary ya ba-Indien kuna. Mpe beto me lobaka, beto mosi, kuna na balweka yina.

³²⁹ Na yina mulobi mbisi yayi vwandaka mutindu ntwenia mosi, beno zaba. Yandi kwendaka kuloba, mpe ba kwendaka ntama na kumu. Beto ke vingila nsemo ya kilumbu kukwisa, beno zaba. Mpe bawu—bawu lendaka diaka ve kuwa muningu ya lubungu, mpe mulobi mbisi yayi kumaka ya muvimba na kidi-kidi, yandi tubaka, “Tuba, beto me kwenda ntama na kumu! Hé!” Yandi kumaka ya muvimba na kidi-kidi.

³³⁰ Yandi tubaka, “Vwanda, mwana. Vwanda.” Kiboba ya mulobi yayi, swi, beno zaba. Yandi zabaka yina yandi vwandaka tuba. Yandi tubaka, “Vingila kaka tii ntangu mwini ke basika, na yina beto lenda mona kisika beto kele.”

Beno ke tuba, “Mu fwana vwanda Methodiste? Baptiste? Pentecotiste?”

³³¹ Beno vingila kaka. Mwana ke basika, beto ke mona kisika beto kele. Yandi kele Ndinga. Beno vingila kumona kumonisama ya Ndinga, kusema na zulu ya Nkuna, Mbuma yina ba me ningisa, beto ke mona kisika beto kele. Beno zola Yandi?

³³² Beno lemvočila munu samu mu me kanga beno ntangu mingi. Bantu yikwa na kati ya beno ke bikana tii na nkokila yayi? Oh, beno vutuka diaka, na nkokila yayi, beno me mona. Pene ya ngunga sambwadi? Nge kele na muntu yankaka? [Mpangi Neville me tuba, “Ve.”—Mu.]

Beto kulumusa bayintu ya beto.

³³³ Ya kele na mosi awa, to mingi, nani kele ve na Ngolo yayi ya nkendusulu na kati ya beno? Mwana me sema na kisika yayi, mpe beno me vwanda na tabernacle yayi, beno me kuwa ba-bande, mpe kasi Mpeve me kindisa beno ntete ve ti beno lendaka landa Ndinga ya Nzambi, ti beno bakento mpe beno babakala lendaka tumama na Ndinga nionso yina Yandi me sonikaka! Oh, yina kele kima ya boma. Yinki kana beno zolaka vwanda nkuna ya kufwa, ata Luzingu ve na kati ya beno? Kasi ya kele na kima mosi na kati ya beno, yina ke zonzaka na beno, “Mu—mu ke zola kutelama, na suka yayi. Mu zola basika na mbanza yina mu kele. Mu ke zola ve kuvwanda mutindu nkuna ya kufwa, kubikana kuna mutindu kimbambala. Mu ke zola kuvumbuka na lufwa.”

³³⁴ Beno zola kutelemisa diboko ya beno, kutuba, “Sambila samu na munu, mpangi?” Nzambi sakumuna nge. Nzambi sakumuna nge. Oh, beno tala maboko; ya kele ve na mutindu ya kusala lubokilu na autel. Yina beto ke bokilaka lubokilu na

autel, bantu ke kwisaka pene-pene ya autel, mu ke zolaka mingi ve kusala yawu, na mutindu nionso. Yina kele kaka kima yina ba me yika na dibuundu na bilumbu ya reveil ya ba-Methodiste. Beno me mona?

335 Biblia ke tuba, “Bayina nionso kwikilaka,” beno me mona, “bawu bakaka mbotika.” Ya kele na baptistère awa, ya kufuluka na maza, yina ke na kuingila ti ba-candidat yina me kubama na kufwa na bawu mosi.

336 Ntangu yayi, ba lendaka zika beno na kati, bambala mingi, na Nkumbu ya Mfumu Yesu; kasi tii kuna nkuna yina kele Luzingu, beno me mona, Yawu ke kindisa yawu ve. Ve, ve, ve. Mbotika ya bamasa kele mutindu kinoko yina me katuka na zulu; ya lenda kubwa na zulu ya nkuna, kasi, kana Luzingu kele ve kuna, ya lenda zinga ve.

337 Kasi kana mbotika yina ya kieleka ya bamasa, ya lufwa na beno mosi, mpe beno me kubama na kufwa na bima nionso yina beno longukaka na nzila ya ba-credo mpe ba-denomination, yina kele ya kuswaswana na Ndinga, mpe beno ke tambula mutindu mwana-bakala to mwana-kento ya Nzambi, mpe beno ke tuba yawu na kati ya ntima ya beno, beno tala mbote yinki mbotika yina ya masa ke sala na beno na suka yayi. “Beno balula bantima ya beno, beno nionso, mpe beno botama na Nkumbu ya Yesu Klisto samu na mulemvo ya bayimbi ya beno, disumu ya beno, mpe beno ke kuzwa Mbuma yina ba me ningisa, dikabu yina ba me ningisa. Beno ke kuzwa dynamique, Mpeve-Santu. Samu nsilulu kele samu na beno, mpe bayankaka nionso. Na bansungi nionso, ya ke vwanda mutindu yina.”

338 Tata Nzambi, mu—mu me tuba ntangu ya yinda, mpe mu me baka ntangu mingi ya bantu, kasi, Mfumu Nzambi, ya kele ve na kima ya kusutope na yawu. Ya ke monana kaka ti beno fwana bika mpe kukwenda ntama, mpe kupema, mpe kuvutuka. Beto ke na kuzinga na yinza yina ke kufwa, na kati ya bantu yina ke na kufwa; na Nsangu ya Luzingu, mpe na nzikisa ya mvumbukulu. Nzambi ya luzolo, beto ke vwanda kaka muntu yina ke kufwa na ntangu mosi, mpe yinki ya ke vwanda kana beto bika ntangu ya mbote yayi kuluta?

339 Bantima ya beto ke na kupela; mioyo ya beto kele na kiesee; na kumona bantu yayi me kota. Mpe bantu mingi awa ke na kuwa Nsangu yayi na suka yayi. Yinga, bankama zole to tatu me telemisa maboko ya bawu. Bawu zola kwikila, Mfumu. Oh, ya kieleka nkuna yina kele ya kufwa ve, Mfumu. Wapi mutindu bawu lenda telemisa diboko ya bawu mutindu yina? Kima mosi kele. O Nzambi, mu ke kiboba munu mosi, ya ke kento yina ya Job me telema kuna, na kutubaka, “Oh!” Kasi, Mfumu, bika ti Job, mukwikidi yina, kutambula, na suka yayi, kufwa ya muvimba, mpe ba zika yandi awa na mbotika yayi ya bamasa.

340 Binoko yina ke katuka na Zulu, Ndinga ya Nzambi yina ke tuba ti Yawu ke katula disumu nionso mpe ke lemvočila yawu! Beno me botama na Nkumbu ya Yesu Klisto, samu na yinki? Mulemvo ya masumu ya beno, ya me lemvočila na Nkumbu ya Yesu Klisto.

341 Bika, na yina, Tata, bika ti. . . Kana bawu kele mbevo, bika ti bawu kubasika mbote. Bika ti, kana bawu kele bikata, bika ti bawu tambula na nsi ya Ngolo ya Mpeve-Santu. Kana bawu vwandaka bansumuki, bika ti bawu basika ya kusukula mpe ya kuvedila. Mpe mekaniki, na kukotaka; Dynamique kukulumuka na Zulu, Mpeve-Santu, mpe kuzangula bawu, Mfumu. Kindisa nzutu ya bawu ya lufwa, na yina beto ke kuwa bandinga ya malumu ya kieleka, bangolo ya Nzambi, zola yina ba lenda zonzila ve, lemvo samu na kufwa mpe lemvo samu na kuzinga; mpe Klisto yina me vumbuka na lufwa, Nzutu, Kento ya makwela ke talisa Yandi na zulu ya ntoto.

342 Tata, ba kele ya Nge. Ba me telemisa maboko ya bawu. Mu me longa Ndinga. Ntangu yayi, Tata, yamba bawu, mu ke sambila. Na Nkumbu ya Yesu Klisto, mu ke lombawu. Amen.

343 Beno zola Yandi? Yandi kele mbote ve? Beno kele na kiese ti beno kele kitini ya mvumbukulu ya Paki yina, ti beno me vumbuka na Yandi? Beno telemisa diboko ya beno. Beno kele na kati.

344 “Bana ya munu ya fioti,” mutindu Paul zolaka kutuba. Mu ke meka ve na kumekula yandi, kasi, ya kele zola, mu ke zolaka beno. Mu ke kutanaka na mipepe ya ngolo na nzila mpe nionso yankaka, samu na kukwisa awa, samu na kutuba na beno. Mu ke basika na ntoto ya kuyuma, na kati ya kinkuku ya mvula-mpembe, mpe nionso yina, samu na kukuma awa. Beto ke pumbuka na avion. Beno ke tambula na kati ya yinsi na ditoma, samu beto vwanza kintwadi. Beto ke zolana mosi na yankaka.

345 Beto kele kitini ya mosi na yankaka. Beno bika ata mbala mosi ve ti Satana kutuba na beno kima yankaka. Na kuvwandaka kitini ya mosi na yankaka, beto kele kitini ya Yandi. Mpe beto kele bisi-ntoto ya Kimfumu, beto ke sepela na balusakumunu yayi, kintwadi, ya mvumbukulu.

346 Mpe ntangu yayi, beno me mona, ntangu yayi beno me vumbuka dezia. Ntangu Nzambi vumbulaka Yandi, Yandi vumbulaka beno. Mwana kele kaka ntangu yayi na zulu ya beno, mpe ntangu yayi beno ke na kukula na Luzingu ya bafelele mutindu Yandi vwanza, samu na kuvumbuka ya muvimba na kilumbu yina ya nsuka. Bangolo ya beno, beno kele na yawu ntangu yayi. Yinki ke sala ti beno zaba? Moyo ya beno me soba, mutindu yina ve? Nzutu ya beno kwisaka samu na kutumama na Yawu, mutindu yina ve? Na kutumama (na yinki, na dibuundu?) na Ndinga, yina kele Luzingu, na ntangu yina beno me vumbuka na lufwa. Ya kele Paki, na Yesu mpe munu. Ya kele Paki, na

beno mpe Yesu. Mpe ya kele Paki, na beno, munu, mpe Yesu. Beto nionso kele. . .To, Yesu, beno, mpe munu, beto nionso me vumbuka na lufwa kintwadi.

347 Mpe beto ke vumbuka na kilumbu ya nsuka, ata ti bampeve ya beto ke bika banzutu ya beto, ata ti banzutu ya beto ke kuma bukelengi, bika yawu vutuka na putulu, bika ti yawu yokama, bika ti yawu vwanda na nsi ya mubu. Biblia me tuba, “Wanzio mosi mwangisaka ya yandi na zulu ya nzadi, mpe yina nionso kufwaka vumbukaka na lufwa.” Kima mosi ve lendaka bumba beto, to lendaka kabula beto, na Nzambi yina beto ke zolaka mingi, yina me vumbula beto kintwadi.

348 Nzambi sakumuna beno. Mu me kanga beno awa ntangu mingi. Kana bantu ke landa beto diaka na allo-allo, ya kieleka bawu. . .Na makumi tanu ya ba-centime na muniti mosi, ya kieleka ba me futa, na suka yayi. Kasi, mu lendaka sukisa ve na ngunga mosi, mu zolaka kwenda kaka na ntwala.

349 Ntangu yayi, kana Mfumu kuzola, mu ke vutuka diaka na nkokila yayi, samu na kuzonza na beno. Mpe kana mu lenda ve, na yina beno nionso zaba. . .Mu banza ti beto kele ve na. . . to ve. . .Beto kele diaka ve na allo-allo? Beto kele diaka ve na allo-allo.

350 Beno nionso zaba kisika mu ke kwenda, mutindu yina ve? Na Afrique! Mu vwandaka lomba yawu kubanda ntama; bamvula mingi mu vwandaka meka na kuvutuka kuna. Ntangu yayi vision, Mpeve ya Mfumu me yidika nzila. Bawu me tuba, ntangu bankundi yina ya mputu ya ndombe kuwaka yawu, ti mu ke kwisa ve na ntangu ya nsuka mu vwandaka kuna, bawu bikanaka ya kulala na ntoto na mwini mpe na mpimpa, mpe ba vwandaka nionga mpe vwandaka dila, mpe ba vwandaka tuba, “Mfumu, yinki beto me sala?” bamafunda na kati ya bawu. Bantu yina ke kwikilaka ve ti bawu kele na moyo. Beno me mona? Mpe bawu bokaka mpe bawu niongaka, mpe bawu dilaka.

351 Beno zabisa yawu ve na ntwala. Pardo beno sala yawu ve. Beno me mona, kana beto kubwa na visa yina kuna mpe yawu zabana na kati ya balongi yina, ba ke kusutope kaka kuna. Mu fwana kota kuna mutindu muzombi. Mu ke kwenda kuna na ntinu-kento yina nataka ba-wagon kumi na sambwadi ya kifuluka na bantu samu na kukwisa na lukutakanu. Mu ke kwenda kuzomba na kizunga ya yandi. Mpe mu ke kota, lombilu ya munu ya passeport mpe nionso yina samu na kukwenda mutindu muzombi, samu na bisalu ya bisambu ve.

352 Na yina ya kele na mpangi-bakala mosi yina ke kutana na munu, yandi ke tuba, “Samu na yinki nge ke kuzwa ve lukutakanu ya fioti samu na beto?” Ba me pesa dezia mbongo samu na ba-stade. Ba me zaba yawu ve. Beno me mona? Oh, nkembo!

353 Beno sambila ti luzolo ya Nzambi kuvwanda ve na nkakalani mosi. Ti, kuboka ya moyo ya munu samu na kuvutuka na Afrique tuka mu me katuka kuna, ti mu ke vutuka kuna diaka, na yina mu ke kwisa vutuka samu na kuzabisa beno ti beto me kuzwa lukutakanu ya nene. Mu banza ti mu ke mona beno diaka ve, kubanda bubu yayi, tii kuna mu ke vutuka. Beto ke kwenda, na mwa bilumbu ntangu yayi, na kilumbu ya kumi ya Ngonda ya tanu. Beno ke sambila samu na munu?

354 Beno bambuka moyo, beno zaba ve yinki bampasi kele, samu na kukuma kuna; bandoki ya nganga-nkisi na balweka nionso, mpe dyabulu, kasi beno banza ve ti bawu zaba ve yinki kusala. Beno me mona? Mpe beno fwana zaba yina beno ke tuba, ntangu beno ke telema na ntwala ya bawu. “Kasi mu zaba Yandi yina mu me kwikila, mpe mu me ndima ti Yandi kele na kiyeka ya kukeba yina Yandi tumaka munu tii na kilumbu yina.”

Ntangu yayi, ya kele na bamuswale yina kele awa.

355 Nzambi ya luzolo, mutindu Nsangu yayi na suka yayi, ya mvumbukulu, mpe mu me telama awa, Mfumu, mpe ke talisa na nzila ya Ndinga ti Ngolo ya nkindusulu kele na kati ya mwana yina ke kwikila. Na yina, mutindu mu ke kwikila, na lukwikilu, ti Ngolo yayi ya nkindusulu me soba luzingu ya munu. Mpe bantu yayi ke kwikila, Mfumu, mpe Yawu me soba baluzingu ya bawu. Mpe beto ke sambila mosi samu na yankaka.

356 Mu ke tentika maboko ya munu na zulu ya bamuswale yayi, ti . . . Ti Nzambi, Yina kindisaka Yesu Klisto mpe telemisaka Yandi na lufwa, mpe Mpeve yina vumbulaka Yandi na lufwa, ke zinga na kati ya nzutu ya beto.

357 Mpeve yina vwandaka na zulu ya nzutu ya Elisée, ti, na manima ya kufwa mpe kima yankaka ve kasi mikwa, yawu vwandaka na Ngolo ya nkindusulu na kati ya yawu. Maboko ya bantumwa vwandaka na Ngolo ya nkindusulu na kati ya yawu. Mabanza ya bantumwa, kumona ya bantumwa, nzonzolo ya bakwikidi, nionso yina vwandaka na Ngolo ya nkindusulu.


358 Ntangu yayi bika ti Ngolo yina ya nkindusulu, mutindu mu ke tentika Ndinga yayi na zulu ya bawu, mpe maboko ya munu samu na kutalisa munkwa ya kima, na nzila ya lemvo, ya Ngolo yina ya nkindusulu, ti Yawu kindisa bantzutu yayi nionso ya bambevo, mpe bawu beluka ya muvimba, Nzambi, na Nkumbu ya Yesu Klisto.

359 Bika ti yawu vwanda kaka ve samu na bamuswale yayi, kasi samu na bantu nionso yina kele na dibuundu, muntu nionso yina ke bela. Bana yayi ya fioti, bambuta, nionso yina bawu kele, bika ti Ngolo yina ya nkindusulu kukindisa bawu na ntangu yayi, na Nkumbu ya Yesu. Amen.

360 Ntangu yayi, bantu yikwa me kuzwa Ngolo ya nkindusulu? Ntangu yayi beno tentika maboko ya beno na zulu ya mosi na yankaka, kana Ngolo yina ya nkindusulu kele na kati ya beno.

³⁶¹ Ntangu yayi, ya kele kaka na kima mosi yina lendaka kanga Yawu nzila, kupekisa, ya kele kukondwa lukwikilu ya beno. Kento yina simbaka lele ya Yandi, yandi belukaka; soda ya Rome yina losaka Yandi mate na kizizi, mpe yandi kwendaka na difelo. Beno me mona? Na yawu ya vwandaka . . . ya me tala kisika beno kele. Beno ke kwikila Yawu? Beno ke kwikila Yawu?

³⁶² Ntangu yayi mu zola ti beno kulumusa yintu ya beno mpe beno sambila samu na mosi na yankaka. Beno sambila kaka—kaka kuna, beno tuba kaka, “Mfumu, muntu yayi” . . . Beno me mona, beno sambila kaka samu na mosi na yankaka.

³⁶³ Nzambi ya luzolo, beto ke sala yayi na Nkumbu ya Yesu Klisto, Nkumbu mosi kaka pesamaka na kati ya bantu samu ti beto kuzwa mpulusu to kubeluka. Bantu yayi, yina kele bisintoto ya Kimfumu, munkwa ya Ngolo ya nkindusulu, kukindisa Yawu na bawu, Mfumu, kaka na ntangu yayi. Mpe bika ti Mpeve kuluta na ngononi na ngononi, na Ndinga na Ndinga, tii kulunga ya Yesu Klisto ke monisama na kati ya banzutu yayi nionso, samu na nzutu, samu na kimpeve, to konso nsatu yina bawu kele na yawu, mutindu beto me tentika maboko ya beto na zulu ya mosi na yankaka. Na Nkumbu ya Yesu Klisto. 

YA KELE KUBASIKA YA MWINI KNG65-0418M

(It Is The Rising Of The Sun)

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 18 ya Ngonda ya yiya, na mvula 1965, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org